

佩文齋廣羣芳譜卷第四

天時譜

夏

增禮記鄉飲酒義南方者夏夏之爲言假也養之長之假之仁也爾雅夏爲朱明註氣赤而光明夏爲長羸尸子南方爲夏夏典也南任也萬物莫不任典蕃殖充盈也原梁元帝纂要夏曰朱夏炎夏三夏九夏天曰昊天風曰炎風節曰炎節草曰茂草雜草木曰蔚林茂林密樹茂樹

彙考**增**禮記王制夏薦麥周禮秋官雒氏掌殺草春

始生而萌之夏日至而夷之原晉書嵇康傳康性絕

巧而好鍛宅有一柳樹甚茂乃激水環之夏月居其上以鍛

山海經

朱提郡堂狼山多毒草盛夏之月飛鳥

過之亦不得去

淮南子武王蔭暘人于柳下而天下

懷

增

淮南子

夏取果蓏

注

有核曰果無核曰蓏

薺

麥夏死而人曰夏生生者衆

尚書考靈曜夏火星昏

中可以種黍

原

括地圖

天毒國最熱夏則草木皆乾

語林陸機在洛夏月忽思東頭竹篠飲語劉寶曰吾

思鄉轉深矣

增

敘問錄

嵇昌蓄採星盆夏月漬果則

倍冷

原

村陽雜編

李輔國夏月堂中設迎涼草其色

碧榦似苦竹葉細於杉刺之牕戶間舉室皆涼

增

熙

朝樂事

西湖夏夜觀荷最宜風露舒涼清香徐細傷花

淺酌如對美人倩笑款語也

清閒供夏時晨起芰荷

爲衣傷花枝吸露午後剝椰子杯浮瓜沉李搗蓮花飲
碧芳酒日晡浴罷掉小舟垂釣於古藤曲水邊薄暮籜
冠蒲扇立層岡看火雲變現林下盟暑月晚涼浴罷
杖履逍遙臨池觀月乘高取風採蓮剝芡剖瓜雪藕白
醪三杯取醉而適其爲樂殆未可以一二數也

集藻

文賦散句

增

梁江淹四時賦炎雲峯起芳樹未移

臯蘭生坂朱荷出池憶上國之綺樹想金陵之蕙枝

唐王勃夏日登韓城門樓序驚花亂下戲鳥平飛荷葉

滋而曉露繁竹院靜而炎氣息

宋王炎夏日郊行賦

麥穠穠而餅餌柔陰陰而繭絲麻旆旆而没人秧芄芄

而布畦

五言古詩

增

梁江總夏日還山庭獨於幽棲地山庭暗

女蘿澗漬長低篠池開半卷荷野花朝暝落盤根歲月
多停尊無賞慰狎鳥自經過

〔梁簡文帝納涼〕斜日晚

駸駸池塘生半陰避暑高梧側輕風時入襟落花還就
影驚蟬乍失林遊魚吹水沫神蔡上荷心翠竹垂秋采
丹棗映疎礎無勞夜遊曲寄此託微吟

〔隋薛道衡梅

夏應教長廊連紫殿細雨應黃梅浮雲半空上清吹隔
池來集鳳桐花散騰龜蓮葉開幸逢爲善樂頻降濟時
才

〔唐韋應物園亭覽物〕積雨時物變夏綠滿園新殘

花已落實高笋半成筠守此幽棲地自是忘機人

〔宋

秦觀田居入夏桑柘稠陰陰翳虛落新麥已登場餘蠶
猶占箔隆曦破層陰霽靄收遠壑雌蜺卧淪漪鮮飈泛
叢薄林深鳥更鳴水漫魚知樂羸老厭煩歎解衣屢磅
礴蔭樹濯涼颺起行遺帶索冢婦餉初還丁男耘有託
倒筒備青錢鹽茗恐垂橐明日輪絹租鄰兒入城郭

七言古詩

增

宋歐陽修歸田樂

南風原頭吹百草草木

叢叢茅舍小麥穗初齊稚子嬌桑葉正肥蠶食飽老翁
但喜歲年熟餉婦安知時節好野棠梨密啼晚鶯海石
榴紅轉山鳥田家此樂知者誰我獨知之歸不早乞身
當及強健時顧我蹉跎已衰老

原

梅堯臣夏熱六龍

銜火燒寰宇魏王冰井若湯煮松枝桂葉凝若癡喘殺

溪頭嘯風虎北冥融却萬丈冰千筋凍鼠忙如蒸我聞
北土長飛雪此時日暎地皮裂仙芝瑤草不敢茁湘川
竹焦琅玕折西郊雲好雨不垂堆青疊碧徒爾爲

增

元薩都刺新夏曲紅泣香枯怨流水夜放籜龍千尺尾

風生宮樹曉層層涼綠一簾收不起煙乾寶鴨白晝清
祝融緩轡行且停薔薇花深霧冥冥碧牕睡起香滿肱

何中山中樂隄柳綠搖新罨畫石榴紅摺嬌裙袂蓮

蕩風閒翡翠欹菱塘雨定鴛鴦下溪女浣紗朝出村行
官飲水暮歸舍瓦餅手挈隔年醅石下坐圍明月夜山
中之樂誰得知我獨知之來何爲空裏烏蟾飛影過桑
麻課效勝書帷

原

鄭奎妻夏月詞芭蕉葉展青鸞尾

萱草花含金鳳嘴一雙乳燕出雕梁數點新荷浮綠水
困人天氣日長時鉞線慵拈午漏遲起向石榴陰畔立
戲將梅子打鶯兒

五言律詩

增

唐駱賓王夏日遊目暫屏塵囂累言尋物

外情致逸心逾默神幽體自輕浦夏荷香滿田秋麥氣
清詎假滄浪上將濯楚臣纓

夏日遊山家

返照下層

岑物外狎招尋蘭徑薰幽佩槐庭落暗金谷靜風聲徹
山空月色深一遣樊籠累唯餘松桂心

杜審言夏日

過鄭七山齋共有樽中好言尋谷口來薜蘿山徑入荷
芰水亭開日氣含殘雨雲陰送晚雷洛陽鐘鼓至車馬
繫遲回

韋應物夏花明

夏條綠已密朱萼綴明鮮炎

炎日正午灼灼火俱燃翻風適自亂照水復成妍歸視

窗間字熒煌滿眼前許渾長興里夏日南鄰避暑侯

家大道傍蟬噪樹蒼蒼開鑠洞門遠下簾賓館涼欄圍

紅藥盛架引綠蘿長永日一欹枕故山雲水鄉宋韓

琦夏景卽事槐耳籠前檻雲峯透曲櫺涼風卽崑閩煩

思入滄溟荷弱翻青蓋榴新倒綠餅晚來收驟雨一枕

夢魂醒邵雍春盡後園閒步綠樹成陰日黃鶯對語

時小渠初激灑新竹正參差倚杖閒吟久攜童引步遲

好風知我意故故向人吹張耒夏日過雨芟荷亂繁

陰竹樹多雛聲知鳥哺萍動見魚過細逕饒苔蘚陰牆

引薜蘿角巾從倒側疎懶欲如何蚓壤排晴圃蝸涎

印雨階花鬚嬌帶粉樹角老封苔問字病多忘過鄰慵
却迴晚涼還盥櫛對竹引清杯 細徑依原僻茅蓬四
五家山田來雉兔溪雨熟桑麻竹籠晨收果茅菴夜守
瓜頗知農事樂從此問生涯 [金龐鑄喜夏] 小暑不足
畏深居如退藏青奴初薦枕黃妳亦升堂鳥語竹陰密
雨聲荷葉香晚涼無一事步履到西廂 [明仁宗池亭]

納涼夏日多炎熱臨池憩午涼雨滋槐葉翠風過藕花
香舞燕來青瑣流鶯出建章援琴彈野操民物樂時康
七言律詩 [增] 唐錢起避暑納涼 木槿花開畏日長時搖
輕扇倚繩牀初晴草蔓緣新筍頻雨苔衣染舊牆十旬
河朔應虛醉八柱天台好納涼無事始知禪靜勝深垂

紗帳詠滄浪 宋陸游逃暑小飲熟睡至暮桑落香浮
榭葉杯甘瓜綠李亦佳哉虛堂頓解汗揮雨高枕俄成
鼻殷雷靜聽風聲生檻竹徐看日影轉庭槐晚涼更動
扁舟興北渚紅蕖已半開 槐影桐陰欲滿廊綸巾羽
扇自生涼新篔玉溼陳雙榼平展風漪可一牀馳騎遠
分丹荔到大盆寒浸碧瓜香湖邊誰謂幽居陋也愛迨
迨夏日長 **源**明王象晉夏日祝融司令繼芳春四望
郊原樂事均翠浪翻池荷蓋綠黃雲布隴麥痕新榴花
焰焰紅噴火葵葉翩翩影應辰偃仰茂林逃酷暑呼朋
酌酒莫辭頻

五言排律

增

唐楊巨源夏日裴尹員外西齋看花笑向

東來客看花枉在前始知清夏月更勝豔陽天露濕呈
妝汗風吹畏火燃葱蘢和葉盛爛熳壓枝鮮紅綵當鈴
閣清香到玉筵蝶棲驚曙色鶯語滯晴煙得地殊堪賞
過時倍覺妍芳菲遲最好唯是謝家憐

五言絕句

御製橋望郊原浮麥氣池沼漾青蘋夏日臨橋望薰風處處

新

增金字文虛中迴文翠密圍窗竹青圓貼水荷睡多嫌
晝永醒少得風和草徑迷深綠蓮池浴膩紅早蟬鳴
樹曲鮮鯉躍潭東

七言絕句增唐皮日休藥名離合夏日卽事桂葉似茸

含露紫葛花如綬，蘸溪黃連雲更入幽深地。骨錄閒攜相蠟郎。高駢山亭夏日。綠樹陰濃夏日長，樓臺倒影

入池塘。水精簾動微風起，滿架薔薇一院香。宋司馬

光夏日西齋書事。榴花映葉未全開，槐影沉沉雨勢來。

小院地偏人不到，滿庭鳥迹印蒼苔。范成大夏日田

園雜興。梅子金黃杏子肥，麥花雪白菜花稀。日長籬落

無人過，惟有蜻蜓蛺蝶飛。五月吳江麥秀寒，移秧披

絮尚衣單。稻根科斗行如塊，田水今年一尺寬。二麥

俱秋斗百錢。田家喚作小豐年，餅爐飯甑無饑色。接到

西風熟稻天。晝出耘田夜績麻，村莊兒女各當家。童

孫未解供耕織也，傍桑陰學種瓜。槐葉初勻日氣涼

葱葱鼠耳翠成雙三公只得三株看閒客清陰滿北窗
千頃芙蕖放棹嬉花深迷路晚忘歸家人暗識船行
處時有驚忙小鴨飛 采菱辛苦廢犁鉏血指流丹鬼
質枯無力買田聊種水近來湖面亦收租 楊萬里夏
日不但春妍夏亦佳隨緣花草是生涯鹿葱解插纖長
柄金鳳仍開最小花 戴曷夏晝小雨小牀蘄篔展琉

璃窗外新篁一尺圍正午雲橋陣雨過冬青花上蜜蜂
歸 元僧善住夏日中庭日午橘花開蜂蝶何知故故
來一陣南薰生殿角亂飄香雪點蒼苔 原明吳寬夏

日綠蔭松蘿暑氣涼清泉瀉入小池塘人間晝永無聊
賴一朵荷花滿院香 增黃氏幼藻夏日深院塵消散

午炎篆煙如夢晝淹淹輕風似與荷花約爲送香來自
捲簾

詩散句

增

周庾信

槐庭垂綠穗蓮浦落紅衣

陳徐陵

嫩竹猶含粉初荷未聚塵

隋李德林

桐枝覆玉檻荷

葉滿銀塘

唐杜甫

公子調冰水佳人雪藕絲

嚴維

蕙風清水殿荷氣雜天香

張籍竹月泛涼影萱露澹

幽叢

原

宋邵雍

夏木無重數叢陰翠樹低

秦觀新

麥已登場餘蠶猶占箔

增

唐方干

樹影與陰侵枕簟

荷香坐久著衣巾

巖溜噴空晴似雨林蘿礙日夏多

寒

宋陸游

池塘激激荷浮葉門巷陰筍放梢

元

方夔棟花零落魚初發梅子青黃雨不乾

早麥熟隨

芹菜餉晚茶香和樹芽蒸 **原**蘇澹林塘乍迸翁孫竹

籬落齊開姊妹花 **增**晉謝朓夏木轉成帷 **周庾信**

夏餘花欲盡 **唐韓偓**暑退松篁健 **李顥**垂藤引夏

涼 **李咸用**雲水沉沉夏亦寒 **宋陸游**簷前桐影偏

宜夏

詞原宋秦觀如夢令門外綠陰千頃兩雨黃鸝相應睡
起不勝情行到碧梧金井人靜人靜風弄一枝花影

增明陳繼儒攤破浣溪紗梓樹花香月半明棹歌歸去
蟬蛙鳴曲曲柳灣茅屋矮挂魚罾笑指吾廬何處是

一池荷葉小橋橫燈火紙窗修竹裏讀書聲 **原**宋蘇

庠臨江仙獵獵風蒲初暑過瀟然庭戶秋清野航渡口

帶煙橫晚山千萬疊別鶴兩三聲 秋水芙蓉聊蕩槩
一樽同破愁城蓼花灘上白鷗明暮雲連極浦急雨暗
長汀 明文徵明青玉案庭下石榴花亂吐滿地綠陰
亭午午睡覺來時自語悠揚魂夢黯然情緒蝴蝶過牆
人 駸駸嬌眼開仍帶悄無人欲出還凝竚團扇不搖
風自舉盈盈翠竹纖纖白苧不受些兒暑

別錄

原

芸窗類記凡收藏書畫於未梅雨前曬極燥頓

匣櫃中厚以紙糊門及小縫令不通風卽不黴古人藏
書多用芸香卽今之七里香也匣櫃須用楸梓杉杪之
類忌油松內不用漆 占候夏冰歲饑五穀不成 製
用夏月凡制一切果蔬俱用臘雪水最佳

四月 立夏小滿附見

增禮記月令孟夏之月日在畢昏翼中旦婺女中註日月會於實沈而斗建巳之辰也 王瓜生苦菜秀 命野虞出行田原爲天子勞農勸民毋或失時 農乃登麥天子乃以彘嘗麥先薦寢廟 聚畜百藥靡草死麥秋至 **原**梁元帝纂要是月曰孟夏亦曰首夏 **增**花月令是月也杜鵑翔木香升新篁敷粉罌粟滿芍藥相木筆書空 **瓶**史月表花盟主芍藥蒼荀夜合花客卿石巖鶯粟玫瑰花使令刺牡丹粉團龍爪垂絲海棠虞美人棟花

彙考**原**詩豳風四月秀萋 **增**夏小正四月囿有見杏

廣雅考證 卷四
王萇莠取茶傳茶也者以爲君薦蔣也

晉書樂志

四月之管名爲仲呂者呂助也謂陽氣盛長陰助成功也 四月之辰謂爲巳巳者起也物至此時畢盡而起

也 四月官田其樹桃 孟夏之月以熟穀禾 律受

夾鐘夾鐘者種始莢也 四民月令四月可種黍謂之

上時 禮斗威儀孟夏驅獸無害五穀 秦中歲時記

長安四月已後自堂厨至百司厨通謂之櫻筍厨 高

僧傳摩歌利頭四月八日浴佛以都梁香爲青色水鬱

金香爲赤色水丘隆香爲白色水附子香爲黃色水安

息香爲黑色水以灌佛頂也 景龍文館記四年四月

上幸司農少卿王光輔莊駕還朝後中書侍郎南陽岑

羲設茗飲葡萄漿與學士等討論經史 東坡詩註成

都太守自正月十日至四月十九日浣花乃止 水衡

記麥黃水四月水名 賞心樂事 四月芳草亭鬪草芙

蓉池新荷蘂珠洞茶蘼滿霜亭菊芽玉照堂青梅豔香

館長春花安閒堂紫笑羣仙繪幅樓前玫瑰餐霞軒櫻

桃詩禪堂盤子山丹花南湖雜花鷗渚亭五色鸞粟花

清閒供 四月十四菖蒲誕 史纂 馬珏居華陽亭牆

外有來禽一株枯已久矣師四月十四日汲水沃之曰

純陽來年是日生於此樹之下 帝京景物畧 四月八

日捨豆兒日結緣十八日亦捨先是拈豆念佛一豆佛

號一聲有念豆至石者至日熟豆人徧捨之其人亦一

念佛啖一豆也是月榆初錢麵和糖蒸食之曰榆錢糕

立夏增禮記月令是月也以立夏先立夏三日太史

謁之天子曰某日立夏盛德在火天子乃齋立夏之日
天子親帥三公九卿大夫以迎夏於南郊 三禮義宗

四月立夏爲節夏大也至此之時物已長大故以爲名

說林立夏日俗尚啖李時人語曰立夏得食李能令

顏色美故是日婦女作李會取李汁和酒飲之謂之駐

色酒一日是日啖李令不疰夏 熙朝樂事立夏之日

人家各烹新茶配以諸色細果餽送親戚比鄰謂之七

家茶富室競侈果皆雕刻飾以金箔而香茶名目若茉莉

林檎桂蕊薔薇丁檀蘇杏盛以哥汝瓷甌僅供一啜

而已 嘉吳記俗於立夏日噉青梅云令人終歲神清

不昏睡

小滿

增孝經緯

立夏後十五日斗指巳爲小

滿

物類相感志

青梅過小滿黃蜀葵過小滿則長

集藻

文賦散句

原

晉傅玄述夏賦四月惟夏運臻正陽

和氣穆而扇物麥含露而飛芒清微泛於琴瑟朱鳥感

於炎荒鹿角解於中野草木蔚其條長 梁昭明太子

錦帶書節屈朱明晷鍾丹陸依依聳蓋俱臨帝女之桑

鬱鬱丹城竝掛陶潛之柳梅風拂戶牖之內麥氣擁宮

闕之前

唐許敬宗麥秋賦

葉幄垂秀條帷泛光鶯傳

枝而嬾娜蜂散蕊而芬芳對銀縉而偶穉竝金縷而分

芒改炎炎之鑠石若慄慄之懷霜

五言古詩

原

晉陶潛讀山海經孟夏草木長遶屋樹扶

疎衆鳥欣有託吾亦愛吾廬旣耕亦已種時還讀我書
窮巷隔深轍頗迴故人車歡言酌春酒摘我園中蔬微
雨從東來好風與之俱泛覽周王傳流觀山海圖俯仰
終宇宙不樂復何如

贈

梁簡文帝和湘東王首夏冷

風雜細雨垂雲助麥涼竹水俱蔥翠花蝶雨飛翔燕泥
含復落鷓吟斂更揚卧石藤爲纜山橋樹作梁欲待華
池上明月吐清光

唐

劉禹錫初夏曲時節過繁華陰

陰千萬家巢禽命子戲園果墜枝斜寂寞孤飛蝶窺叢
覓晚花

白居易首夏南池獨酌春盡雜英歇夏初芳

草深薰風自南至吹我池上林綠蘋散還合蘋鯉跳復

沈新葉有佳色殘鶯猶好音依然謝家物池酌對風琴
慙無康樂作秉筆思沈吟境勝才思劣詩成不稱心
宋梅堯臣孟夏二日通判太博惠庭花前日已春盡夏
卉抽嫩青唯君所植花餘紅猶滿庭常惜畏景逼贈未
及飄零欲插爲之醉但慙髮星星

七言古詩原唐李賀四月樂詞曉涼暮涼樹如蓋千山
濃綠生雲外依微香雨青氛氳膩葉蟠花照曲門金塘
閑水搖碧漪老景沈重無驚飛墜紅殘萼暗參差

五言律詩

御製夏日迎薰亭苑啓時初夏亭陰午未闌雨過池藻碧日
綻海榴丹水木含清景禽魚得靜觀薰風能解慍試取玉

琴彈 夏日郊行節變春方去清和助麥秋蔚林乘早夏
茂草接新流柳絮隄邊起荷錢水上浮風光殊舊日此意
未曾休 初夏玉泉山二首別館依丹麓疎簾映碧莎泉
聲當檻出花氣入垣多路轉溪橋接舟沿石竇過薰風能
阜物藻景已清和 山翠引鳴鑣湖光漾畫橈野雲低隔
寺沙柳暗藏橋百囀黃鸝近雙飛白鷺遙今年農事早時
雨足新苗

增唐韋應物始夏南園思舊里夏首雲物變雨餘草木
繁池荷初貼水林花已掃園縈叢蝶尚亂依閣鳥猶喧
對此殘芳月憶在漢陵原 白居易早夏遊平泉迴夏
早日初長南風草木香肩輿頗平穩澗路甚清涼紫蕨

行看採青梅旋摘嘗療饑兼解渴一盞冷雲漿 [宋司

馬光首夏呈諸鄰] 首夏木陰薄清和自一時筍抽八九

尺荷生三四枝新服裁蟬翼舊扇拂蛛絲莎徑熟未劇

晨昏來往宜 [陸游幽居初夏] 梅塢青黃子草陂紅紫

花雙鷺朝戲浦羣鴨暮還家赤脚挑殘筍蒼頭摘晚茶

山門逢野老滿意說桑麻 [元白珽餘杭四月] 四月餘

杭道一晴生意繁朱櫻青豆酒綠草白鷺村水滿船頭

滑風輕袖影翻幾家蠶事動寂寂畫門關 [明陳憲章

四月] 四月陰晴裏山花落漸稀雨聲寒月桂日色煖醅

醲病起初持酒春歸尚掩扉午風吹蛺蝶低趁乳禽飛

生意日無涯乾坤自不知受風荷柄曲擎雨柏枝垂

三

靜坐觀羣妙聊行覓小詩臨階愛新竹抽作碧參差

七言律詩原唐皮日休四月十五日和陸龜蒙道室書

事望朝齋戒是尋常靜啓金根第幾章竹葉飲爲甘露

色蓮花鮮作肉芝香松膏背日凝雲磴丹粉經年染石

牀剩欲與君終此志頑仙惟恐鬢成霜宋蔡襄四月

池上風下平池水暈開池邊露坐水風來草香苒苒生

吟席雲影飛飛度酒杯荷葉偶成雙翠蓋荔枝纔似小

青梅人閑物靜兩相得月色蒼涼始肯迴陸游初夏

閒居城上朱旗夏令初溪頭綠水蘸菰蒲花貪結子無

遺萼燕接飛蟲正哺雛簫鼓賽蠶人盡醉陂塘移稻客

相呼長安青蓋金羈馬也有農家此樂無戴昺四月

卽景茶歌纔了又田歌節物真成一鳥過蒼竹颭風涼
意足碧梧留雨夜聲多瓜緣茅屋抽長蔓藕過蔬畦出
矮荷最喜白鷗相狎久對人自在浴清波 真山民初
夏一葉薰風帶暑回雨天濃翠與庭槐不隨春去鶯猶
在好競時妝榴又開翦尺旋裁新白苧杯盤聊薦舊青
梅篋中敝扇投閒久依舊團團入手來

五言排律

增

唐太宗賦得夏首啓節北闕三春晚南榮

九夏初黃鶯弄漸變翠林花落餘瀑流還響谷猿啼自
應虛早荷向心卷長楊就影舒此時歡不極調軫坐相
於 白居易春末夏初閒遊江郭二首閒出乘輕屐徐
行蹋軟沙觀魚傍湓浦看竹入楊家林迸穿籬笋藤飄

落水花雨埋釣舟小風颺酒旗斜嫩剝青菱角濃煎白茗茶淹留不知夕城樹欲棲鴉柳影繁初合鶯聲澀

漸稀早梅迎夏結殘絮送春飛西日韶光盡南風暑氣

微展張新小簾熨帖舊生衣綠蟻杯香嫩紅絲鱸縷肥

故園無此味何必苦思歸首夏猶清和聯句記得謝

家詩清和卽此時白居易餘花數種在密葉幾重垂裴度芳

謝人人惜陰成處處宜劉禹錫水萍爭點綴梁燕共追隨

自行亂蝶憐疎蕊殘鶯戀好枝張籍草香殊未歇雲勢漸

多奇白居易單服初寧體新篁已出籬裴度與春爲別近覺

日轉行遲劉禹錫繞樹風光少侵階苔蘚滋自行唯思奉

歡樂長得在西池張籍

七言絕句

御製夏口閒坐
雲斂風微紫燕飛
春光已去夏初歸
清襟羸得天然處
暗覺花香到玉扉

增宋司馬光初夏
首夏清和
新雨晴綠荷細軟不妨行

園夫遮道白何事
梔子花開斑笋生
王安石初夏卽

事石渠茅屋有彎碕
流水濺濺度兩陂
晴日煖風生麥

氣綠陰幽草勝花時
東陂荷葉初開
筍漸抽東陂南

蕩正堪遊無端隴上
條條麥橫起寒風
占作秋陳造

早夏安石榴花猩血
鮮涼荷高葉碧田
田鱗魚入市河

豚罷已是江南打麥
天范成大初夏四首
清晨出郭

更登臺不見餘春
只麼回桑葉露枝
蠶向老菜花成莢

蝶猶來 晴絲千尺挽韶光
百舌無聲燕子忙
永日屋頭槐影暗
微風扇裏麥花香
東君不解惜芳菲
料峭寒中一夢非
非翦盡牡丹梅
子綻何須風雨送春歸
一

簾芳樹綠葱葱
蝴蝶飛來覓綺叢
雪白荼縻紅寶相
尚攜春色見薰風
陸游初夏紛紛紅紫已成塵
布穀聲

中夏令新夾路桑麻行不盡
始知身是太平人
槐柳

成陰雨洗塵櫻桃酪乳併嘗新
占來江左多佳句
夏淺

勝春最可人
楊萬里初夏麥黃秧碧
百家衣已熱猶

寒四月時雨後
覓春無一寸
薔薇花發醞燕脂
手種

琅玕劣十年
今年新笋不勝繁
不知明早添多少
日暮

閒來數一番
戴敏遊張園
乳鴨池塘水淺深
熟梅天

氣半晴陰東園載酒西園醉摘盡枇杷一樹金

詩散句 **增** 晉謝靈運首夏猶清和芳草亦未歇 **原** 謝

朧麥候始清和涼雨消炎燠 **唐** 太宗一朝春夏改隔

夜鳥花遷 **增** 張說庭柳餘春駐宮櫻早夏催 **原** 杜

甫摘荷纔首夏驄馬尚餘春 **錢** 起花萼敗春多寂寞

葉陰迎夏已清和 **宋** 謝伯初園林換葉梅初熟池館

無人燕學飛 **蘇** 軾吳國晚蠶初斷葉占城早稻欲移

秧 **陸** 游采茶歌裏春光老煮繭香中夏景長 風和

柳岸吹綿後雨足瓜畦引蔓時 梅子生仁已帶酸棟

花墮地尚微寒

詞 **原** 明陳繼儒攤破浣溪沙蜂欲分衙燕補巢清和天

氣綠陰嬌一陣窗前風雨到打芭蕉 驚起幽人初睡
午茶煙繚繞出花梢有箇客來琴在背度紅橋 [葉夢
得黃金縷睡起流鶯語掩蒼苔房櫳向曉亂紅無數吹
盡殘花無人問惟有垂楊自舞漸煖靄初回輕暑寶扇
重尋明月影暗塵侵尚有乘鸞女驚舊恨鎮如許 江
南夢斷衡臯渚看黏天蒲菰漲綠半空煙雨無限樓前
滄波意誰採蘋花寄取空惆悵蘭舟容與萬里雲帆何
時到送孤鴻目斷千山阻誰爲我唱金縷

別

占候月內有三卯宜麻無則麥不收月內寒主

旱諺云黃梅寒井底乾 諺云有穀無穀且看四月十
六立一丈竿量月影月當中時影過竿雨水多沒田夏

旱人饑長九尺主三時雨水八尺七尺主雨水六尺低
田大熟高田半收五尺主夏旱四尺蝗三尺人饑

增

農政全書分龍之日農家於是日早以米篩盛灰藉之
紙至晚視之若有雨點迹則秋不熟穀價高人多閉糶

諺云二麥不怕神共鬼只怕四月八日雨大抵立夏
後雨多便損麥蓋麥花夜吐雨多花損

種植秋王瓜

麥門冬芝麻蘿蔔扁豆粟紫蘇菱莧小豆絲瓜枇杷葱

瑞香芡

〔移植〕石菖蒲櫻桃茄秋海棠茉莉梔子秋牡

丹枇杷葱翠雲草菊芋

〔壓插〕玉繡毬木樨梔子錦葵

玉蝴蝶木香茶蘼芙蓉

〔收採〕稀荻草白蘚根菜子析

冥子桃杏仁蠶豆柴胡筍乾楮實黃葵花蒼耳子紅花

五月 芒種夏至端午附見
糝仁桑椹 整頓防露傷麥翦菖蒲鋤葱素馨斫楮皮
埋蠶沙伐樹絡麻 田忌天火西九焦未地火未糞忌
寅荒蕪申

五月

芒種夏至端午附見

增禮記月令仲夏之月日在東井昏亢中旦危中註日
月會於鶉首而斗建午之辰也 農乃登黍天子乃以

雛嘗黍羞以含桃先薦寢廟令民毋艾藍以染 半夏

生木堇榮

原

梁元帝纂要五月曰仲夏亦曰暑月臯

月

花月令

是月也葵赤紫薇葩薜葡萄始馨夜合交榴

花照眼紫椹降於桑

增

瓶史月表五月花盟主石榴

番萱夾竹桃花客卿蜀葵洛陽花午時紅花使合川荔

枝梔子花火石榴孩兒菊一丈紅石竹花

彙考

增

周禮秋官仲夏斬陰木註陰木秋冬生者若松

柏之屬

夏小正五月乃衣瓜傳瓜者急瓜之辭也瓜

者始食瓜也

初昏大火中種黍菽糜時也煮梅爲豆實也蓄蘭爲

火者心也心中種黍菽糜時也煮梅爲豆實也蓄蘭爲

沐浴也

晉書樂志五月之辰謂爲午午者長也大也

言物皆長大也五月之管名爲蕤賓蕤垂下貌也

賓敬也謂時陽氣下降陰氣始起相賓敬也

風俗通

五月落梅風江淮以爲信風

風土記五月有霖靈號

爲梅雨霑衣皆敗謂之送梅雨

歲時雜記仲夏多大

雨名濯枝雨

水衡記五月瓜蔓水五月瓜延蔓故以

名 〔夢溪筆談〕五月草木茂盛逾於初生故曰勝先

賞心樂事五月聽鶯堂摘瓜重午節泛蒲煙波觀碧蘆

南湖萱花綺互亭火笑花水北書院采蘋鷗渚亭五色

蜀葵清夏堂楊梅叢奎閣榴花豔香館林檎摘星軒枇

杷 〔清閒供〕五月十三竹醉日 〔芒種〕 〔增〕 嬾真子錄 陝

州夏縣士人樂舉明遠嘗云二十四氣其名皆可解獨

小滿芒種說者不一僕因問之明遠曰皆為麥也小滿

四月中謂麥之氣至此方小滿而未熟也芒種五月節

種該數類之種謂種之有芒者麥也至是當熟矣僕因

記周禮稻人澤草所生種之芒種註云澤草之所生其

地可種芒種稻麥也僕近為老農始知過五月節則稻

不可種所謂芒種五月節者謂麥至是而始可收稻過是而不可種也古人名節之意所以告農候之早晚深哉

夏至

增

周禮秋官柞氏掌攻草木及林麓

夏日至

令刊陽木而火之疏夏日至謂五月夏至之日爲之也

令刊陽木而火之謂先削以去其皮乃燒之

管子夏

至而麥熟天子祀太宗其盛以麥穀之始也

荆楚歲

時記夏至日食糗取菊爲灰以止小麥蠹按干寶變化

論云朽稻爲蠶朽麥爲蛺蝶此其驗乎

風土記夏至

前芒種後雨爲黃梅雨田家初插秧謂之發黃梅

端

午

增

玉燭寶典洛陽人家端午造木羹艾酒以花絲作

樓閣插鬢贈遺辟瘟扇

荆楚歲時記五月五日四民

樓閣插鬢贈遺辟瘟扇

竝蹋百草又有鬪百草之戲採艾爲人懸門戶以禳毒
氣按宗則嘗以五月五日鷄未鳴時採艾見似人處攬
而取之用灸有驗 是日競渡採雜藥 〔風土記〕端午
烹鶩進筒糗一名角黍以菰葉裹黏米栗棗以灰煮令
熟蓋取陰陽包裹未散之象 〔千金月令〕端午以菖蒲
或鏤或屑以泛酒 〔採蘭雜志〕杜羔妻趙氏每歲端午
午時取夜合花置枕中羔稍不樂輒取少許入酒令婢
送飲羔卽歡然當時婦人爭效之 〔酉陽雜俎〕五月進
五時圖五時花施帳之上 〔歲時雜記〕端午刻菖艾爲
小人子或葫蘆形帶之辟邪 〔吳中歲時記〕端午簪艾
葉榴花以辟邪 〔乾淳歲時記〕端午禁中插食盤架設

天師艾虎意思山子數十座五色蒲絲百草霜以大盒
三層飾以珠翠葵榴艾花蜈蚣蛇蝎蜥蜴等謂之毒蟲
又以大金瓶數十遍插葵榴梔子花環繞殿閣及分賜
后妃諸閣大璫近侍翠葉五色葵榴金絲翠扇真珠百
索釵符經筒香囊軟香龍涎佩帶及紫練白葛紅蕉之
類大臣貴邸均被紉葛香羅蒲絲艾朶彩團巧粽之賜
而外邸節物大率效尤焉

熙朝樂事端午爲天中節

家家買葵榴蒲艾植之堂中或採百草以治藥品

東

京夢華錄端午節物百索艾花銀樣鼓兒花花巧畫扇

香糖果子糗子白團紫蘇菖蒲木瓜竝皆葺切以香藥

相和用梅紅匣子盛裹自五月一日及端午前一日賣

桃柳蒲葉葵花佛道艾次日家家鋪陳於門首與糗子
五色水團茶酒供養又釘艾人於門上士庶迎相宴賞
歲華紀麗譜五月五日宴大慈寺設廳醫人鬻艾道
人賣符朱索綵縷長命辟災之物筒飯角黍莫不咸在
遼志五月五日午時採艾葉與綿相和絮衣七事國
主著之臣僚各賜艾衣三事國主及臣僚飲宴渤海厨
子進艾糕各點大黃湯下北呼此時爲討賽離又以雜
絲或綠結合歡索纏於臂膊婦人進長命縷宛轉皆爲
人像帶之

集藻

文散句

源

魏文帝與吳質書雜賓紀時景風扇物

天氣和煖衆果具繁

梁昭明太子錦帶書麥隴移秋

桑律漸暮蓮花泛水豔如越女之顒蘋葉漂風影亂秦
臺之鏡炎風以之扇戶暑氣於是盈樓凍雨洗梅樹之
中火雲燒桂林之上

五言古詩

增

周庾信奉和夏日應令朱簾捲麗日翠幕

蔽重陽五月炎氣蒸三時刻漏長麥隨風裏熟梅逐雨
中黃開冰帶井水和粉雜生香衫含蕉葉氣扇動竹花
涼早菱生軟角初蓮開細房願陪仙鶴舉洛浦聽笙簧
宋陸游時雨時雨及芒種四野皆插秧家家麥飯羹
處處菱歌長老我成惰農永日付竹牀衰髮短不櫛愛
此一雨涼庭木集奇聲架藤發幽香鷲衣濕不去勸我
持一觴卽今幸無事海際皆農桑野老固不窮擊壤歌

虞唐

七言古詩 **增** 宋陸游怡齋東湖仲夏草樹荒屋古無人

亭午涼萱房微呀不見日
筍籜自解時吹香野藤蟠屋
入窗罅濕菌扶疎生屋梁
跨溝數椽最幽翳漲水及檻
雨敗牆靜涵青蘋舞藻荇
閒立白鷺浮鴛鴦芙蓉雖瘦
亦瀟灑照眼翠蓋遮紅妝
水紋珍簾欲卷却團團素扇
嬾復將天風忽送塔鈴語
喚覺清夢遊瀟湘

五言律詩

御製午日令序當重午南臺日正中
玉階鳴瀑水瑤軫奏薰風
菖葉浮杯綠榴花照檻紅
臨流看競渡轉憶濟川功

途次端午蕤賓逢夏律午日俯澄流
黃鳥林中變新蒲岸

外稠宮筵傳綵纓，仙酒泛丹榴。遙憶蓬萊上，垂楊蔭御溝。
增宋陸游重五重五山村好，榴花忽已繁。纓包分兩髻，艾束著危冠。舊俗方儲藥，羸軀亦點丹。日斜吾事畢，一笑向杯盤。

七言律詩**原**唐李德裕嶺南道中嶺水爭分路，轉迷枕
榔柳葉暗蠻溪，愁衝毒霧逢蛇草，畏落沙蟲避燕泥。五
月畚田收火米，三更津吏報潮雞。不堪腸斷思鄉處，紅
槿花中越鳥啼。**增**元成廷珪夏日過萬蓬菴愛汝東
菴暑氣薄，解衣盤礴坐莓苔。一林綠竹盡可數，五月白
蓮猶未開。捉麈談禪知獨往，買魚沽酒待重來。滄江日
落山更好，且放輕舟緩緩迴。明虞堪午日訪沈元圭

席上次韻一簾葵錦爛晴霞五色絲虹映臂紗玄藥自
消頭上雪絳榴誰插鬢邊花茶烹石鼎從施禁詩寫蠻
箋學破邪不是西山黃石叟難逢東老地仙家 **原何**

景明午日五月五日天氣鮮艾葉榴花對眼前鄉土歲
時殊不惡閭閻風俗自堪憐鄰人角黍能相送野老蒲
觴得共傳回首十年車馬地每逢佳節淚潛然 **文徵**
明仲夏有懷五月江南櫻笋殘疎花吹盡綠漫漫雨來
却及梅黃候春去猶餘麥秀寒白日幽深茆屋靜野情
蕭散苧袍寬美人何處經時別滿耳新蟬獨倚闌

五言絕句 **繪** 宋蘇軾端午皇帝閣帖子詞採秀擷羣芳

爭儲百藥良太醫初薦艾庶草驗蕃昌 **皇太妃閣端**

午帖子詞雨細方梅夏風高已麥秋應憐百花盡綠葉
暗紅榴 [太皇太后閣端午帖子詞]日永蠶收簇風高
麥上塲朝來藉田令菰黍獻時芳 [夫人閣端午帖子
詞]肅肅槐庭午沈沈玉漏稀皇恩樂佳節鬪草得珠璣
六言絕句 **增**宋鼂補之仲夏卽事紅葵有雨長穗青棗
無風壓枝溼礎人霑汗際蒸林禪烈號時

七言絕句 **增**宋王安石五月與和叔同遊齊安縑成白

雪桑重綠割盡黃雲稻正青他日玉堂揮翰手芳時同
此賦林垌 [蘇軾皇太后閣端午帖子詞]祕殿扶疎夏

木深雨餘初有一蟬吟應將羸女乘鸞扇更助南風長
棘心 上林珍木暗池臺蜀產吳包萬里來不獨盤中

見盧橘時於糗裏得楊梅

皇太妃閣端午帖子詞玉

盆沈李灩清泉金鳴噓空裊細煙自有梧楸障畏日仍

欣麥黍報豐年

陸游重午葉底榴花蹙絳繪街頭初

賣苑池冰世間各自有時節蕭艾著冠稱道陵

原僧

道潛臨平道中春蒲獵獵弄輕柔欲立蜻蜓不自由五

月臨平山下路藕花無數滿汀洲

增金趙秉文夏至

玉堂睡起苦思茶別院銅輪碾露芽紅日轉階簾影薄

一雙蝴蝶上葵花

馬定國村居五月南風化蟪蛄野

塘晚筍未成蒲檉花落盡紅英細沙渚鴛鴦半引雛

元迺賢月湖竹枝詞五月荷花紅滿湖團團荷葉綠雲

扶女郎把釣水邊立折得柳條穿白魚

詩散句原唐李白大火五月中景風從南來數枝石榴

發一丈荷花開五月梅始黃蠶稠桑柘空山花異

人間五月雪中白增宋李邦直艾葉成人後榴花結

子初唐陳羽池上樓臺五月涼百花開罷水芝香

方干長潭五月來冰氣孤檜中宵學雨聲宋章得象

五日看花憐竝蒂今朝鬪草正宜男花陰轉午清風

細玉燕釵頭艾虎輕陸游瓜蔓水生初抹岸梅黃雨

細欲遮樓戴履古海榴花上雨蕭蕭自切菖蒲泛濁

醪元周權人家綠艾端陽節天氣黃梅雨細時顧

瑛梧竹一庭涼欲雨池臺五月氣涵秋明唐順之榴

吐千花承雨蓋莫開五葉拂瑤墀唐韓翃寒水浮瓜

五月時

薛能槐柳陰陰五月天

宋王珪瑤墀九御

薦菖華

秦觀菡萏吹風五月秋

章得象菖蒲泛酒

堯樽綠

元馬士熙曲闌五月櫻桃紅

詞原

宋蘇軾阮郎歸綠槐高柳咽新蟬薰風初入絃碧

紗窗下水沈煙碁聲驚晝眠微雨過小荷翻榴花開

欲然玉盆纖手弄清泉瓊珠碎又圓吳禮之喜遷鶯

梅霖初歇正絳色海榴爭開佳節角黍包金香蒲切玉

是處玳筵羅列鬪巧已輸年少玉腕綵絲雙結艤畫舫

見龍舟兩兩波心齊發奇絕難畫處激起浪花翻作

湖間雪畫鼓轟雷紅旗掣電奪罷錦標方徹望中水天

日暮猶自珠簾高揭棹歸晚載荷香十里一鈞新月

增劉克莊賀新郎思遠樓前路望平隄十里湖光畫船
無數綠蓋盈盈紅粉面葉底荷花解語鬪巧結同心雙
縷尚有經年離別恨一絲絲總是相思處相見也又重
午清江舊事傳荆楚歎人情千載如新尚沈菰黍且
盡樽前今日醉誰肯獨醒弔古泛幾盞菖蒲綠醕兩兩
龍舟爭競渡奈珠簾暮捲西山雨看未足怎歸去

別錄

原占候博雅月內有三卯宜稻及大小豆無則宜

早豆

五月大種瓜不下五月小種秧必須早五月

小瓜果吃不了

田家五行志夏至在月初主雨水調

諺云夏至端午前坐了種田年夏至在月中耽閣糶米
翁夏至值甲寅丁卯粟貴朔日植芒種六畜災值

夏至冬米大貴 十日得辰早禾半收十一日得辰五
穀不收 [歲時記]夏至在初二三主米麥貴初五米貴

諺云夏至連端午家家賣兒女初七八米麥平二十大

饑上旬米賤中旬大豐米大賤末旬大歉米大貴 便

民圖纂五月暴熱之時看窠草忽自枯死主有水 種

植晚大豆夏蘿蔔黑豆黃豆晚菘菜赤豆菘豆瓜 移

植枇杷月季荼蘼薔薇木香櫻桃石榴錦帶棠棣玉堂

春西河柳橘瑞香寶香素馨剪春羅竹橙 [收採]菖蒲

蒜臺麥諸菜子馬齒莧青箱子卷柏藤花莧天茄苗白

花菜大小薊旋覆花紅花萱花杜仲蛇牀子馬蘭子酸

漿草黃柏槐花浮萍蒲公英益母草車前子金銀花天

麻艾水仙根豨莶草罌粟子蔴黃澤瀉
〔整頓〕制苧蔴
砍桑枝糞桑採練葛
〔製用〕金門歲節重午日午時有
雨則急砍一竹竹節中必有神水瀝取和獺肝爲圓治
心塊腹聚等病
〔田忌〕天火子地火酉荒蕪已九焦卯
糞忌午

六月 伏附見

〔增〕禮記月令季夏之月日在柳昏火中且奎中〔註〕日月
會於鶉火而斗建未之辰也 溫風始至 命澤人納
材葦 樹木方盛命虞人入山行木毋有斬伐 〔原花〕
月令是月也萱宜男鳳仙來儀菡萏百子凌霄登茉莉
來賓玉簪搔頭 〔增〕瓶史月表六月花盟主蓮花玉簪

茉莉花客卿百合山丹山礬水木樨花使令錦葵錦燈籠長雞冠仙人掌蘋桐鳳仙花

彙考原

詩 豳風六月食鬱及薹

增 夏小正

六月煮桃

傳 桃也者拖桃也拖桃也者山桃也煮以爲豆實也

晉書樂志 六月之辰謂之未未者味也言時萬物向成有滋味也 六月之管名爲林鍾林者林茂也謂時物

茂盛於野也

雲仙雜記 房壽六月召客坐湘竹簾凭

狐文几編香藤爲俎劔椰子爲杯搗蓮花製碧芳酒調羊酪造含風酢皆涼物也 **內觀日疏** 六月廿四日爲

觀蓮節鼃采與其夫各以蓮子饋遺爲歡

夢溪筆談

六月萬物小盛故曰小吉

暇日記 六月山礬水

賞

心樂事六月蒼寒堂後碧蓮碧宇竹林避暑芙蓉池賞
荷花約齋夏菊清夏堂新荔枝霞川食桃

吳郡記荷

花蕩在葑門之外每年六月廿四日遊人最盛畫舫雲
集露幃則千花競笑舉袂則亂雲出峽揮扇則星流月
映聞歌則雷輓濤趨蘇人遊冶之盛至是日而極矣

伏原四民月令初伏薦麥瓜於祖禰

東京夢華錄都

人最重三伏蓋六月中別無時節往風亭水榭峻宇高
樓雪檻冰盤沈李浮瓜流杯曲沼苞鮓新荷遠邇笙歌
通夕始罷

增清閒供

六月初伏薦麥瓜中伏碧筒勸

竹篠飲二十四日蓮誕

集藻文散句原梁昭明太子錦帶書三伏漸終九夏將

謝螢飛腐草光浮帳裏之書蟬噪繁柯影入機中之髮
濯枝遷潦溢芳槿茂而發榮山土焦流金海水沸而漂
爍

五言古詩增宋鼂補之夏季夏季百果繁兔葵亦成實
獨有野石榴幽花時熠熠非獨好芳榮賴午日翻
翩彼白蜨髣髴采挹睡餘起對此嘉興亦蕭瑟良非
阡陌麗敢競陽春出無言以成蹊上愧桃李質幸當飽
霜餘萬顆富君室

七言古詩增宋蔡襄甲辰初伏快雨涼風晝眠初覺庭
前小欄花木各有意氣效柏梁體閏夏天氣熱焰烘崇
朝快雨隨清風晝軒夢覺開前櫳畫欄花草意氣雄側

枕遙聞數異同如此微物煩化工盍各言爾之所從繁

葩富豔生朱紅

川海棠

枯條大蕊千萬重

緋桃

修榦點綴赤

日中

蜀葵

蠲去憂忿誰與功

草萱

採摘烹煑祛煩芻

百合

秋霜

巨實垂如甕

木瓜

橫柯遠引交加叢

紅玫瑰

葉抽綠劍端黃

茸薑直立開披泉貨通

金錢

疊繞翠羽翻蚪龍

薜荔

誤入畦

町非余公

黃麻

助滌渴肺思匪躬

麥門冬

物物自名詞不窮

願當我意乃汝容負汝不飲慙衰翁

歐陽修初伏日

招王幾道小飲北園數畝官牆下嗟我官居如傳舍渚

沱北渡馬踏冰西山病歸花已謝落英不見空繞樹細

草初長猶可藉空園一鎖不復窺不覺芳蹊繁早夏隔

牆時時聞好鳥如得嘉客聽清話今朝試去繞園尋綠

李橫枝礙行馬蒲萄憶見初引蔓翠葉陰陰還滿架紅
榴最晚子已繁猶有殘花藏葉罅人生有酒復何求官
事無了須偷暇古云伏日當早歸況今著令許休假能
來解帶相就飲爲子埽月開風榭

七言律詩

原

唐王維積雨輞川莊作積雨空林煙火遲

蒸梨炊黍餉東菑漠漠水田飛白鷺陰陰夏木嘯黃鸝
山中習靜觀朝槿松下清齋折露葵野老與人爭席罷
海鷗何事更相疑

增

宋韓琦六月六日雨後過嶽廟

遊從封寺觀稼暑雨頻經信宿休近郊方出釋潛憂雖
妨麥始二停獲且見苗知一半收神嶽怖民藏電雹老
松憑寺偃蛟虬佳遊况遇從豐識好飾于倉待有秋

七言絕句原宋蘇軾西湖畢竟西湖六月中風光不與

四時同接天蓮葉無窮碧映日荷花別樣紅

詩散句增宋蘇軾遠郭荷花一千頃誰知六月下塘春

元龔璠六月涼如冰熨齒枇杷移陰碧書几梁庾

信六月蟬鳴稻

詞原明陳繼儒浪淘沙風雨霎時晴荷葉青青雙鬢捧

著小紅燈報道綠紗廊底下蕉月分明枕簟嫩涼生

茉莉香清蘭花新吐百餘莖撲得流螢飛去也團扇多情

情

別錄原占候六月無蠅主米價平諺云六月無蠅新舊

相登三伏宜熱諺云六月不熱五穀不結蓋當槁稻

之時又當下壅晴熱則苗旺涼雨則苗沒立秋在晦旱
稻遲〔種植〕秋赤豆秋菜豆豇豆蘿蔔胡蘿蔔素馨芥
菜晚瓜蔓青小蒜〔壅培〕麥冬橙芋韭橘〔灌溉〕菊牡
丹芍藥茉莉〔收採〕花椒苧竹青箱子紫草槐花藕天
仙子蓮鬚蓮花松香杜仲鳳仙花莖菱科苜蓿蓮房茅
根乾漆藿香白芷葛苧菜葦草菌郁李根野白薺地踏
菜燈草旋覆花眼子菜澤瀉〔整頓〕鋤竹園漚麻耕麥
地〔製用〕洽聞記日濟國西南海中有三島各相去數
十里其島出黃漆似中夏漆樹彼土六月破樹腹取汁
以漆器物若黃金其光奪目〔田忌〕天火卯九焦子糞
忌子地火巳荒蕪辰

佩文齋廣羣芳譜卷第四

佩文齋廣羣芳譜卷第五

天時譜

秋

禮記鄉飲酒義西方者秋秋之爲言愁也 **爾雅**秋

爲白藏注氣白而收藏 秋爲收成 **尸子**西方爲秋

秋肅也萬物莫不禮肅也 **原**梁元帝纂要秋曰三秋

九秋素秋素商高商天曰旻天風曰商風素風淒風高

風涼風激風悲風景曰朗景澄景清景時曰淒辰霜辰

節曰素節商節草曰荒草木曰疎木衰林霜柯霜條

原易兌卦兌正秋也萬物之所說也 **詩小雅**秋

日淒淒百卉具腓 **增**管子秋至而禾熟天子用祀於

大藏

淮南子

秋風下霜

倒生挫傷

注

草木首地而生

故曰倒生挫傷者凋落也

秋畜蔬食

注

菜蔬曰蔬穀

食曰食

三統歷說

秋爲陰中萬物以成

原

羯鼓錄

明皇製秋風高曲每奏之則清風徐來夜葉交墜

增

清閒供秋時晌午用蓮房洗硯理茶具拭梧竹午後戴

白接籬著隱士衫望紅樹葉落得句題其上薄暮焚香

壅菊

集

文賦散句

原

楚屈原九歌

嫋嫋兮秋風洞庭波兮

木葉下

宋玉九辨

悲哉秋之爲氣也蕭瑟兮草木搖

落而變衰憊慄兮若在遠行登山臨水兮送將歸次寥

今天高而氣清寂寥兮收潦而水清 皇天平分四時

兮竊獨悲此凜秋白露既下降百草兮奄離披此梧楸
〔漢東方朔七諫〕秋草榮其將實兮微霜下而夜降商
風肅而害生兮百草育而不長 〔晉潘岳秋興賦〕耕東
臯之沃壤兮輸黍稷之餘稅泉涌湍于石間兮菊揚芳
乎崖涘 〔湛方生秋夜賦〕悲九秋之爲節物凋悴而無
榮嶺頽鮮而隕綠木傾柯而落英 〔宋沈勃秋羈賦〕菊
圖縟于園沼橘倒飾于池側草改貌而傾蕢林伐狀而
搖蒂潭歛氣而威荷露危光而嚴蕙 〔梁元帝秋興賦〕
洞庭之葉初下塞外之草前衰 〔秋風搖落辭〕秋風起
兮寒鴈歸寒蟬鳴兮秋草腓萍青兮水澈葉落兮林稀
翠爲蓋兮玳爲席蘭爲室兮金作扉水周兮曲堂花交

今洞房樹參差兮密稍紫荷紛披兮疏且黃 唐王勃

秋夜山亭宴集序紅蘋綠荇亘渚連翹玉帶瑤華分欄

間植池簾夕敞香牽十步之風岫幌宵寒氣襲三危之

露 李白悲清秋賦荷花落兮江色秋風嫋嫋兮夜悠

悠臨窮溟以有美思釣鰲于滄洲 劉禹錫秋聲賦松

竹含韻梧楸早脫驚綺疏之晚吹墜碧砌之涼月 黃

滔秋賦駿鳥咸赫顧兔添明池上落紅蕖之態煙中吟

玉笛之聲泰華峰高染蓮花而翠活湘川樹老換楓葉

以丹生愈碧高山偏清漢水松柏風高兮歲寒出梧桐

蟬急兮煙翠死

五言古詩 原晉江道詠秋祝融解炎轡葍收起涼駕高

風催節變凝露督物化長林悲素秋茂草思朱夏鳴雁
薄雲嶺蟋蟀吟深榭寒蟬向夕號驚颺激中夜感物增
人懷悽然無欣暇 宋劉鑠秋歌 旻天清且高秋風發
初涼白露下微津明月流素光凝煙泚城闕淒風入軒
房朱華先零落綠草就芸黃織羅還笥篋輕紈改衣裳
鮑照詠秋 秋蘭徒晚綠流風漸不親 颺我垂罍幕驚

此梁上塵沉陰安可久 豐景將遂淪何由忽靈化暫見
別離人 增周庾信秋日 蒼茫望落景羈旅對窮秋 賴

有南園菊殘花足解愁 原庾信遊昆明池 秋光麗晚

天鷁舸泛中川密菱障浴鳥高荷沒釣船碎珠縈斷菊
殘絲繞折蓮落花摧十酒栖鳥送一絃 唐太宗度秋

夏律昨留灰秋箭今移晷
峩嶢岫初出洞庭波漸起
棲白發幽巖菊黃開灞涘
運流方可歎含毫屬微理

贈

李白秋思春陽如昨日
碧樹鳴黃鸝蕪然蕙草暮
颯爾涼風吹天秋木葉下
月冷莎鷄悲坐愁羣芳歇
白露凋華滋
王昌齡秋興日暮西北堂
涼風洗修木著書在南
牕門館常肅肅苔草延古
意視聽轉幽獨或問余所
營刈黍就寒谷
白居易早秋曲江感懷
離離暑雲散嫋嫋涼風起
池上秋又來荷花半成子
朱顏易銷歇白日無窮已
人壽不如山年光急于水
青蕪與紅蓼歲歲秋相似
去歲此悲秋今我復來此

新秋西風飄一葉

庭前颯已涼風池明月
水衰蓮白露房其奈江南
夜綿

綿自此長
溫庭筠秋日爽氣變昏旦神臯徧原隰煙

華久蕩搖石澗仍清急柳闇山犬吠蒲流水禽立菊花
明欲迷棗葉光如濕天籟思林嶺車塵倦都邑譁張風
所違悔恹何由入芳草秋可藉幽泉曉堪汲牧羊燒外
鳴林果雨中拾復此遂閒曠翛然脫羈繫田收鳥雀喧
氣肅龍蛇蟄佳節足豐穰良朋阻遊集沉機日寂寥葆
素常呼吸投迹倦攸往放懷志所執良時有東菑吾將
事蓑笠
宋歐陽修秋晚凝翠亭黃葉落空城青山繞
官廨風雲淒已高歲月驚何邁陂田寒未收野水淺生
派晴林紫榴折霜日紅梨臙蕭疎喜竹勁寂寞傷蘭敗
叢菊如有情幽芳慰孤介嘉客日可攜寒醅美新醪登

臨無厭頻冰雪行卽屈

司馬光秋意三首槐花滿庭

除籍籍不可掃稍疎邵平瓜漸熟王陽棗失時團扇棄
新進袷衣好日暮益愁思寒蠶起幽草忽聞秋興篇歎
賞幾絕倒端居倦煩暑園圃久不窺雨餘秋氣新紅
葉生紫梨形骸得蕭散不知環堵卑何能效流俗把酒
須菊枝登高已可醉四野青雲垂弱植生川澤托根
北堂後昔時青春姿扶疎映軒牖風霜日消落憔悴復
何有蠹穿枯節斷雨漬虛心朽幸不夭天年猶得勝凡
柳陸游秋花歎秋花如義士榮悴相與同豈比輕薄
花四散隨春風黃菊抱殘枝寂寞臥寒雨拒霜更可憐
和蒂浮煙浦古來結交意正要共死生讀我秋花詩可

代丹鷄盟 **原**明馮琦秋色遽如許客心鬱未安微微

日影薄肅肅天宇寬高風下木葉零露被崇蘭四氣自
幹運誰爲衰盛端朱華曾幾何素萼忽已殘楚楚松柏
姿凌風以自完願言附高節與君同歲寒

七言古詩 **原**唐無名氏秋月色驅秋下穹昊梁間燕語

辭巢蚤古苔凝紫貼瑤堦露槿啼紅墮江草越客鞿魂
挂長道西風欲揭南山倒粉娥恨骨不勝衣映門楚碧
蟬聲老 **增**宋邵雍秋日飲後晚歸水竹園林秋更好

忍把芳樽容易倒重陽已過菊方開多情不學年光老
雲陰不動柳條低風遞輕寒梧葉槁無涯逸興不可收
馬蹄慢踏天街草 **元**何中山中樂空山一夜生新雨

涼起賞心千萬緒。扇團自守不依人。桐葉知幾尋脫路。
隔隴笑談雜樵牧。臨流賓從惟鷗鷺。旋庖蘆菹美勝酥。
精淅新秔香滿戶。山中之樂誰得知。我獨知之來何爲。
青林紅樹人煙濕。護得金橙密處垂。

五言律詩

御製禁園秋霽樹冷催蟬咽。荷疎表影長。深秋殘暑氣微爽。
待高陽戶外遠。塵蹟園中多。蕙香溶溶新雨霽。吟乏愧成
章

增唐太宗秋日翠微宮秋光凝翠嶺。涼吹肅離宮。荷疎
一蓋缺。樹冷半帷空。側陣移鴻影。圓花釘菊叢。攄懷俗
塵外。高眺白雲中。秋日二首。菊散金風起。荷疎玉露

圓將秋數行鴈離夏幾林蟬雲凝愁半嶺霞碎纈高天
還似成都望直見峩嶵前 爽氣澄蘭沼秋風動桂林
露凝千片玉菊散一叢金日岫高低影雲空點綴陰蓬
瀛不可望泉石且娛心 王維山居秋暝空山新雨後
天氣晚來秋明月松間照清泉石上流竹喧歸浣女蓮
動下漁舟隨意春芳歇王孫自可留 原李白秋登宣
城謝朓北樓江城如畫裏山晚望晴空兩水夾明鏡雙
橋落彩虹人煙寒橘柚秋色老梧桐誰念北樓上臨風
懷謝公 包佶秋日過徐氏園林回塘分越水古樹積
吳煙埽竹催鋪席垂蘿待繫船鳥窺新罅栗龜上半欵
蓮屢入忘歸地長嗟俗事牽 增白居易荅劉戒之早

秋別墅見寄涼風木槿籬暮雨槐花枝併起新秋思爲
得故人詩避地烏擇木入朝魚在池城中與山下喧靜
闇相思 許渾早秋遙夜泛清瑟西風生翠蘿殘螢委
玉露早雁拂金河高樹曉還密遠山晴更多淮南一葉
下自覺老烟波 雍陶和劉補闕秋園寓興小木多陰
冷池塘秋意多庭風吹故葉堦露淨寒莎愁雁窺燈語
情人見月過砧聲聽已別蟲響復相和 閉門無事後
此地卽山中但覺鳥聲異不知人境同晚花開爲雨殘
果落因風獨坐還吟酌詩成酒已空 秋色庭蕪上清
朝見露華疎篁抽晚笋幽藥吐寒芽引水新渠淨登臺
小徑斜人來多愛此蕭爽似仙家 禁掖朝迴後林園

勝賞時野人來辨藥庭鶴往看碁晚日明丹棗朝霜潤
紫梨還因重風景猶自有秋詩
鄭谷郊野蓼水菊籬

邊新晴有亂蟬秋光終寂寞晚醉自留連野濕禾中露
村闌社後天題詩滿紅葉何必浣花牋
宋邵雍秋夜

浮雲一消散星斗粲長天碧蘚墜丹果清香生白蓮體
涼猶衣葛耳靜已無蟬坐久羣動息秋空唯寂然
歐

陽修秋郊曉行寒郊桑柘稀秋色曉依依野燒侵河斷
山鴉向日飛行歌採樵去荷鋤刈田歸秫酒家家熟相

邀白竹扉
陸游新秋秋氣入清笳旗亭酒可賒長歌
穿小市短帽插幽花溪女留新蟹園公餉晚瓜誰知開

老子解作醉生涯
金趙風秋郊晚望桃竹猶堪杖幽

尋興頗嘉池荷能幾葉籬菊不多花地坼成龜兆林枯
出犬牙村農慶豐歲社鼓已三搗

師拓曲江秋望山

歸嶂重出野平天四圍涼風芟實坼久雨藕花肥水澗
漁舟小天長去鳥微紫蒲行處有采采莫盈衣

元權

山中秋夕黃卷存餘習青燈共晚涼只知書味永不覺
鬢絲長老檜千年物幽蘭一國香平生陶靖節此夕邈

相望

明仁宗江樓秋望遠碧接天涯登臨景自佳蘋

洲晴亦雪楓岸晝常霞落雁過前浦浮鷗傍淺沙竹籬
高曬網茅屋是漁家

秋風玉律轉清商金颺送晚涼

輕飄梧葉墜暗度桂花香月下生林籟天邊展雁行吹
噓禾黍熟萬頃似雲黃

原張祥鳶秋望快閣臨飛鳥

遙天入斷峰白雲山面面紅葉樹重重空翠當杯落晴
光刺眼濃願言隨楚客木末採芙蓉

七言律詩

增

唐溫庭筠郊居秋日稻田鳧雁滿晴沙釣

渚歸來一逕斜門帶果林招邑吏井分蔬圃屬鄰家
原寂歷垂禾穗桑竹參差映豆花自笑謾懷經世策不
將心事許煙霞

原

趙嘏長安秋夕雲物淒涼拂曙流

漢家宮闕動高秋殘星幾點雁橫塞長笛一聲人倚樓
紫豔半開籬菊靜紅衣落盡渚蓮愁鱸魚正美不歸去
空戴南冠學楚囚

韋莊秋日早行上馬蕭蕭襟袖涼

路穿禾黍繞宮牆半山殘月露華冷兩岸野風蓮萼香
煙水驛樓紅隱隱渚邊雲樹暗蒼蒼行人自是心如火

兔走烏飛不覺長。
增元何中秋懷采采蘋花可佩香
依依橘柚未全黃。人行塞北非征戍。雁過江南有稻梁。
短笛疎鐘來別浦。亂鴉飛鷺過斜陽。西風擾擾知何似。
看見黃花滿地霜。
明陸樹聲獨憐秋色倍清幽。花月娟娟夜氣浮。滿院風飄香欲散。一天雲淨影交流。光搖皓魄庭如水。寒染霜葩玉作毬。把酒啜英誇二美。賞心還以繼前修。

五言排律
增唐太宗秋日卽事爽氣浮丹闕。秋光澹紫宮。衣碎荷疎影。花明菊點叢。袍輕低草露。蓋側舞松風。散岫飄雲葉。迷路飛煙鴻。砌冷蘭凋佩。闈寒樹殞桐。別鶴棲琴裏。離猿啼峽中。野落飛星箭。弦虛半月弓。芳霏

夕霧起暮色滿房櫳
盧照鄰山林休日出家歸休乘
暇日饁稼返秋場徑草疏王簪巖枝落帝桑耕田虞訟
寢鑿井漢機忘戎葵朝委露齊棗夜含霜南澗泉初冽
東籬菊正芳還思北牕下高臥偃羲皇

五言絕句

增

唐王績秋夜喜遇王處士北場芸蕘罷東

臯刈黍歸相逢秋月滿更值夜螢飛

原

李白綠水曲

綠水明秋月南湖採白蘋荷花嬌欲語愁殺盪舟人

錢翊江行萬木已清霜江邊村事忙故溪黃稻熟一夜

夢中香

七言絕句

原

唐吳融涼思松間小檻接波平月淡煙沉

暑氣清半夜水禽棲不定綠荷風動露珠傾

增

李商

隱到秋扇風漸瀝簟流離萬里南雲滯所思守到清秋
還寂寞葉丹苔碧閉門時

宋秦觀秋辭二首雲惹低

空不更飛班班紅葉欲辭枝秋光未老仍微暖恰似梅
花結子時

無數青莎繞玉堦夕陽紅淺過牆來西風

莫道無情思未放芙蓉取次開

范成大秋口碧蘆青

柳不宜霜染作滄洲一帶黃莫把江山誇北客冷雲寒
水更荒涼

陸游秋懷闌丁傍架摘黃瓜村女沿籬采

碧花城市尚餘三伏熱秋光先到野人家

金高士談

楊休烈村居籬落牽牛放晚花西風吹落滿人家閉門

久雨青苔滑時見鴛鴦下白沙

柿葉經霜菊在溪天

寒落日見雞棲西家有客芻新酒紅葉蕭蕭蓋芋畦

趙元秋日禾穗纒纒豆角稠崧前村落太平秋熙熙多
少豐年意都在農家社案頭元郭鈺秋辭鶴認琪花
欲下遲蓬萊仙客遣催詩情深寫到相思處秋露芙蓉
開滿池明世宗秋日卽事拂暑金風動袞裳滿天商
吹助新涼農家萬寶收成後十里遙聞禾黍香陳繼
儒草綠蘋香穀水紋秋山寂寂冷斜曛庭前雙桂牕留
影時宿寒鴉與斷雲秋老江瀕漾夕空蕭蕭楓葉挂
疎紅那知三泖清秋思偏寄蘆花一寺中

詩散句增宋鮑照氣交蓬門疎風數園草殘梁簡文
帝池蓮翻罷葉露篠生寒條蕭愨芙蓉露下落楊柳

月中疎周王褒苑寒梨樹紫山秋菊葉黃
庾信殘

秋欲屏扇餘菊尚浮杯唐太宗露結林疎葉寒輕

吐滋盧照鄰窮巷秋風

葉空庭寒露枝李義府關樹凋涼葉塞草落寒花

張說汀葭變秋色津樹入寒煙蘇頌落暉隱桑柘秋

原被花實李嶠梧桐稍下葉山桂欲開花李白

爲滄浪客十見紅渠秋張均洲白蘆花吐園红柿葉

稀尹忭風秋樹色雜苔古石文斑司空曙花酣蓮

報謝葉在柳呈疎韓翃蒹葭露下晚菡萏水中秋

風翦荷衣碎霜迎栗罅開李商隱秋應爲紅葉雨不

厭青苔桐樞日零落雨餘方寂寥溫庭筠江館白

蘋夜水關紅葉秋李咸用柳葉飄乾翠楓枝撼碎紅

數花籬菊晚片葉并梧秋 許渾葦花迷夕棹梧葉

散秋砧 方干 細雨蓮塘晚疎蟬橘岸秋 徐鉉 雨久

莓苔紫霜濃薜荔紅 宋邵雍 紅葉戰西風黃花笑寒

日 陸游 秋色滿江干江楓已半丹 元吳萊 梧桐老

葉恨芙蓉新藥愁 吳師道 紅惜芙蓉落青憐薜荔生

明謝榛 閒庭秋一色滿架豆花垂 唐韓翃 風吹山

帶遙知雨露濕荷花已報秋 溫庭筠 三秋岸雪花初

白 一夜林霜葉盡紅 韓偓 楓葉微紅近有霜碧雲秋

色滿吳鄉 稻壟蓼紅溝水清荻園葉白秋日明 宋

秦觀 莫誇春色欺秋色未信桃花勝菊花 陸游 夕露

正看沾草棘晨霜已見落楸槐 楊萬里 秋風畢竟無

多巧只把燕支滴蓼花 金辛愿 煙迷短草秋還綠露

濕寒花晚更香 元仇遠 山分秋色歸紅葉風約蘋香

入畫船 蕭國寶 丹楓葉落霜初肅白葦花開月倍明

周權 梧葉庭除秋漸老豆花籬落晚初晴 明沈德

符繞林行藥挈軍持小插秋花寄遠思 原文徵明 江

空露下芙蓉葉月出風吹桂樹枝 陳繼儒 疎菊籬邊

如待酒芰荷池上可爲衣 王象晉 禾黍滿塲堆玉粒

橘橙弄色挂金壘 增晉謝朓 秋町鬱蒙茸 周庾信

霜天林木燥 陳徐陵 江秋岸荻黃 唐李白 木落識

歲秋 秋風生桂枝 清秋凋碧柳 韓翃 秋江落葉

遲 李咸用 薄日朦朧秋 李濤 秋槐滿地花 于濬

秋沼生荷芰

杜甫清秋幕府井梧寒

司空曙菊花

楓葉向誰秋

李益柿葉翻紅霜景秋

李商隱秋日

當階柿葉陰

鄭谷紅葉黃花秋景寬

杜荀鶴秋水

鷺飛紅蓼晚

宋蘇軾楓葉蘆花秋興長

秦觀雨荷

風蓼不勝秋

元葉顥黃花有恨驚秋老

趙孟頫露

下碧梧秋滿天

張雨秋在梧桐疎處多

明孫太初

菰米蓮房作好秋

詞原明劉基眼兒媚煙草淒淒小樓西雲壓雁聲低雨

行疎柳一絲殘照數點鴉棲春山碧樹秋重綠人在

武陵溪無情明月有情歸夢同到幽閨增宋劉鎮念

奴嬌嫩涼生曉怪今朝湖上秋風無迹古寺桂香山色

外腸斷幽叢金碧驟雨俄來蒼煙不見苔徑孤吟屐擊
船高柳晚蟬咽破愁寂 且約攜酒高歌與鷗相好分
坐漁磯石算只藕花知我意猶把紅芳留客樓閣空濛
管絃清潤一水盈盈隔不如休去月懸良夜千尺

別錄原千金方秋宜食黍桃蔥 秋耕宜早恐霜後掩

入陰氣 收五穀擇吉日上倉先祭倉神 收藏鮮果
梨橘之類帶枝插蘿蔔或芋中仍用紙或乾穰草包護
瓮勿通氣

七月

立秋七月
夕附見

增禮記月令孟秋之月日在翼昏建星中旦畢中註日
月會于鶉尾而斗建中之辰也 涼風至白露降 是

月也農乃登穀天子嘗新先薦寢廟註黍稷之屬于是始熟 命百官始收歛註順秋氣收歛物 **原**梁元帝

纂要七月日孟秋首秋初秋上秋肇秋蘭秋又曰涼月

花月令是月也桐報秋木槿榮紫薇映月蓼紅菱實

鷄冠報曉 **增**瓶史月表七月花盟主紫薇蕙花花客

卿秋海棠重臺朱槿花使令波斯菊水木香矮雞冠向

日葵

詩豳風七月食瓜 七月烹葵及菽 **增**夏小

正七月莠藿葦傳未莠則不爲藿葦莠然後爲藿葦故

先言莠 湟潦生萃爽死萃秀傳湟潦生萃也者湟下

處也有湟然後有潦潦而後有萃草也爽也者猶疏也

萃也者馬鬣也 初昏織女正東鄉時有霖雨灌茶傳
灌聚也茶藿葦之莠也爲蔣楮之也藿未莠爲莢葦未
莠爲蘆 〔晉書樂志〕七月之辰謂爲申申者身也言時
萬物身體皆成就也 七月之管名爲夷則夷平也則
法也謂萬物將成平均皆有法則也 〔秦中歲時記〕進
士下第當年七月復獻新文求拔解故曰槐花黃舉子
忙 〔水衡記〕荻苗水七月八月莢花故以名 〔夢溪筆
談〕七月百穀成實自能任持故曰太乙 〔賞心樂事〕七
月餐霞軒五色鳳仙花玉照堂玉簪西湖荷花南湖觀
魚應鉉堂東葡萄霞川水荳珍林剝棗 〔洽聞記〕河中
鳳林關有靈巖寺七月十五日溪穴流聖柰出大如瓊

〔楚志〕水陸寺在沔江深不可測名蓮花潭於初秋良
夜有蓮花豔出水面香浮襲人 〔立秋〕增禮記月令是

月也以立秋先立秋三日太史謁之天子曰某日立秋
盛德在金天子乃齋立秋之日天子親帥三公九卿諸
侯大夫以迎秋于西郊 〔要覽〕列子御風常以立春歸

乎八荒立秋遊乎風穴是風至草木皆生否則搖落謂
之離合風 〔東京夢華錄〕立秋日滿街賣楸葉婦女兒

童輩皆剪成花樣戴之是月瓜果梨棗方盛京師棗有
數品靈棗牙棗青州棗亳州棗雞頭上市則梁門裏李
和家最盛中貴戚里取索供賣內中泛索金合絡繹士
庶買之一裹十文用小新荷葉包糝以麝香紅小索兒

繫之賣者雖多不及李和一色揀銀皮子嫩者貨之
熙朝樂事立秋之日男女咸戴楸葉以應時序或以石
楠紅葉剪刻花瓣插鬢邊或以秋水吞赤小豈七粒
七夕增荆楚歲時記七月七夕人家婦女結綵縷穿七
孔鍼陳瓜果于庭中以乞巧有喜子網於瓜上則以爲
符應風土記或問董勛七日爲良日飲食不同于古
何也勛曰七月黍熟七日陽數故曰珍糜今惟設湯餅
不復有糜矣說林七月七日陳豐以青蓮子十枚寄
葛勃勃啖未竟墜一子於盆水中有喜鵲過惡汗其上
勃遂棄之明早有並蒂花開於水面如梅花大取置几
頭數日始謝房亦漸長剖之各得實五枚如豐來數自

是鄉人改雙星節爲雙蓮節

原東京夢華錄七月七

夕以小板傅土旋種粟令生苗置小茅屋花木作田舍
家小人物皆村落之態謂之穀板又以瓜雕刻成花樣
謂之花瓜又以菜豆小豆小麥於磁器內以水浸之生
芽數寸以紅藍綵縷束之謂之種生皆於街心設綵幟
帳貨賣前三五日車馬盈市羅綺滿街旋折未開荷花
都人善做假雙頭蓮取玩一時提攜而歸又小兒須買
新荷葉執之蓋效顰磨喝樂至初六日七日晚貴家多
結綵樓於庭鋪陳磨喝樂花瓜酒焚香列拜謂之乞巧
五色線仙子云天寶六載侍輦驪山七夕夜張錦綉
樹瓜花陳飲食焚香於庭拜縷針紅線

致虛閣雜俎

薛瑤英於七月七日令諸婢共翦輕綵作連理花千餘
朶以陽起石染之當午散於亭中隨風而上徧空中如
五色雲霞久之方沒謂之渡河吉慶花藉以乞巧 七
夕徐婕妤雕鏤菱藕作奇花異鳥攢於水晶盤中以進
上極其精巧上大稱賞賜以珍寶無數上對之竟日喜
不可言至定昏時上自散置宮中凡上令宮人暗中摸
取以多寡精麤爲勝負謂之鬪巧以爲歡笑 誠齋雜
記蔡州丁氏女精於女紅每七夕禱以酒果忽見流星
墜筵中明日瓜上有金梭自是巧思益進 常氏日錄
七日將午時酒服菖蒲一二寸飲酒不醉

集藻

文賦散句

增

晉盧湛感運賦

氣激激而浸冷霜微

微而日華翠葉紛以朝落朱華慘以夕捐 **原**梁昭明

太子錦帶書桂吐花于小山之上梨翻葉于大谷之中

唐王勃七夕賦玉繩湛色金漢斜光煙淒碧樹露濕

銀塘視蓮潭之變彩見松院之生涼引驚蟬于寶瑟宿

蘭燕于瑤篴 **宋**田錫早秋賦桐葉潛零下玉欄兮金

井桂花增麗鑿珠簾兮綺疏

四言古詩 **原**晉潘尼七月七日侍皇太子宴商風初授

辰火微流朱明送夏少昊迎秋嘉禾茂園芳草被疇于

時秋游以豫以休

五言古詩 **原**北周庾信奉和初秋落星初伏火秋霜正

動鐘北閣連橫漢南宮應鑿龍祥鸞棲竹實靈蔡上芙

蓉自有南風曲還來吹九重
唐李賀七月樂辭星依
雲渚冷露滴盤中圓好花生木末衰黃愁空園夜天如
玉砌池葉極青錢僅厭舞衫薄稍知花簞寒曉風何拂
拂北斗光闌干

五言律詩

御製早秋新霽卷幔過新雨披襟納好風餘霞明遠岫
射睛虹稼穡豐年足乾坤爽氣同高大雲斷處歷歷見初
鴻

增唐太宗儀鸞殿早秋寒驚薊門葉秋發小山枝松陰
背日轉竹影避風移提壺菊花岸高興芙蓉池欲知涼
氣早巢空燕不窺
宋邵雍和文思早秋一雨洗觚

稜三川氣象清林風傳巖氣木葉送商聲忽忽蓮生葯
看看菊吐英太平時裏老何以報虛生池畔拖垂柳
闌邊笑晚霞敗荷傾敝蓋老檜露枯槎歲暮驚時態年
高惜物華東陵風未替解憶故園瓜陸游初秋藉草
沾衣露沿溪掠面風桐凋無茂綠蓮老有疎紅小杓欹
危度鄰園曲折通新秋得強健一笑莫匆匆

七言律詩

御製立秋前一日晚同左右閒坐進鮮果偶作初到金風天
氣晚微涼雨後畫簾垂九重迴出白雲遠三殿高臨北斗
移珍果滿盤新獻節碧梧一葉報秋時漏深不寐題詩句
月色輝煌照鳳墀

增唐韋莊早秋夜作翠簾初清暑半銷撇簾松韻送輕
颺莎庭露永琴書潤山郭月明砧杵遙傍砌綠苔鳴蟋
蟀繞簾紅樹織蟪蛄不須更作悲秋賦王粲辭家鬢已
凋
明景氏翩翩七夕樓前蕭史憶吹簫鴈足西風倍
寂寥望斷支機應化石愁填烏鵲未成橋素毫月冷吟
梧葉紈扇秋回識柳條姊妹東鄰如乞巧莫教瓜果浪
相招

七言絕句

增

宋范成大七月十六日石湖路中書事白

葛烏紗稱老農溪南溪北水車風稻頭的皪黏朝露步
入明珠翠網中
立秋後二日泛舟越來溪西風初入
小溪帆旋織波紋縵淺藍行入開荷無水面紅蓮沉醉

白蓮酣 元趙雍初秋夜坐夜深庭院寂無聲明月流

空萬影橫坐對荷花三兩朶紅衣落盡秋風生

詩散句 增唐鄭槩江南孟秋天稻花白如氈 白居易

清風水蘋葉白露木蘭枝 韋莊柿葉添紅影槐柯減

綠陰 李商隱桂含爽氣三秋首冀吐中旬一葉新

宋陸游風生細葛無三伏月上疎林正四更

詞 願宋歐陽修漁家傲七月新秋風露早諸蓮未折庭

梧老是處瓜花時節好金樽倒人間綵縷爭祈巧 萬

葉敲聲涼乍到百蟲啼晚煙如埽漏箭初長天杳杳人

語悄那堪夜雨催清曉

別錄 原古候有三卯田禾熟無則旱種麥 種植蘿蔔

白菜蕪菁芥菜秋黃瓜甜菜萬苣芫荽水仙根苦蕒晚
紅花牛膝蔥烏菘臘梅子蜀葵韭澆灌桂樹忌澆橙
橘糞〔收採〕胡桃乾薑磨菇斑猫浮萍楮實瞿麥刈藍
卷柏海棠覆盆子使君子畢澄茄麻子藕蔓荆子蘇黃
莖白薔薇刈苧芋石硫黃馬鞭草露蜂房石龍芮皮鼠
尾草甜瓜蒂天門冬眼子菜旋覆花白蒺藜荷葉槐實
藿香五加皮菱芡石韋蒺藜漆〔整頓〕漚晚麻翻麥地
伐木斫竹製用醬鳳仙莖製瓜蠶曬葫蘆茄瓜乾

田忌〔天火午地火辰荒蕪亥九焦酉糞忌酉〕

八月

秋分中
秋附見

〔增〕禮記月令仲秋之月日在角昏牽牛中旦黃鰲中〔註〕

日月會于壽星而斗建酉之歲也 天子乃難以達秋
氣以犬嘗麻先薦寢廟 乃命有司趨民收斂務蓄菜
多積聚乃勸種麥母或失時其或失時行罪無疑 **原**
花月令是月也槐黃蘋笑芝草奏功桂香秋葵高掇金
錢及第 **增**瓶史月表八月花盟主丹桂木樨芙蓉花
客卿寶頭雞冠楊妃權花使令水荳花翦秋羅牡丹花
山茶花

彙考

原詩

商風八月萑葦

八月其穫

八月斷壺

八月剝棗

增

夏小正

八月剝瓜

傳剝瓜也者畜瓜之

時也

剝棗臬零傳剝也者取也零也者降零而後取

之故不言剝也

晉書樂志

八月之辰謂爲酉酉者猶

廣羣芳譜

天詩譜五

八月

九

也謂時物皆縮也 八月之管名爲南呂南呂任也

謂時物皆秀有懷任之象也 續齊諧記鄧紹八月旦

入華山採藥見一童子執五綵囊盛柏葉上露如珠滿

囊紹問用此何爲荅曰赤松先生取以明眼言終便失

所在 荆楚歲時記八月十四日以錦綵爲眼明囊遞

相餉遺註按述征記云八月一日作五明囊盛取百草

頭露洗眼令眼明也 風土記里俗以八月雨爲豆花

雨 夢溪筆談八月枝條堅剛故曰天罡 賞心樂事

八月湖山尋桂現樂堂秋花衆妙峰山木犀霞川野菊

綺互亭千葉木犀桂隱攀桂杏花莊雞冠黃葵 成都

古今記八月有桂市 山家清事八月八日爲竹醉日

種竹易活

荀譜竹八月謂之小春熟欲去寒欲來故

曰小春

秋分

增

宋書律志秋分而禾稊定標定而禾

熟律之數十二故十二標而當一粟一粟而當一寸

中秋

增

瑣碎錄中秋無月則兔不孕蚌不胎蕎麥不實

乾淳歲時記中秋夕禁中賞月延桂

通考八月十

五為移花日

禪林備覽有梵僧從天竺驚山飛來云

八月十五日夜桂子落

清閒供八月十五日牡丹誕

集藻

文賦散句

原

梁昭明太子錦帶書黃花笑冷白羽

悲秋既傳蘇子之書更泛陶公之酒

增

元王柏長嘯

山游記辛卯秋八月與客游於北山於時丹楓纈林香

桂染袖金粟垂顛翠莢吐英芙蓉靚冶籬菊敷茂紫蘭

廣羣芳譜

天時譜五

八月

示

兮抗莖濯蘂於深幽香稻兮春玉斂珠於踐蹂懸顛舊
于棗栗粲青黃于橘柚日暄而不燭雨寒而不驟正
年之佳景候也

五言古詩原晉孫綽秋日蕭瑟中秋日雁唳風雲高山

居感時變遠客興長謠疎林積涼風虛岫結凝霄湛露
灑庭樹密葉亂縈條撫葉悲先落攀松羨後凋垂綸在
林野交情遠市朝澹然懷古心濠上豈伊遙

增唐白

居易南湖晚秋八月白露降湖中水方老旦夕秋風多
衰荷半傾削手攀青楓樹足蹋黃蘆草慘淡老容顏零
落秋懷抱有兄在淮楚有弟在蜀道萬里何時來煙波
白浩浩

七言古詩增宋徐積八月十四夜有人望月吟太虛半
夜秋風吹碧蘆碧蘆風起吹老桂吟聲入月驚蟾蜍明
夜中秋更好吟兔肥蟾大桂成林桂兔之外有何物玉
池水到中秋溢秋風刮水如霜滴

五言律詩增唐廖凝中秋月九十日秋色今宵已平分
孤光含列宿四面絕纖雲衆木排疎影寒流疊細紋遙
遙望丹桂心緒正紛紛

七言律詩原明蔡羽秋思清秋山色淨簾櫳八月芙蓉
滿鏡中醉任嶺雲連海綠愁禁楓葉接天紅養魚好伴
鷗夸子飲水如無桑苧翁江上美人期不到吹簫獨自
向虛空

七言絕句 **原** 宋韓琦仲秋八日雲臺觀羣花盛開春早
凡花百種榮秋芳能得幾多名仙家八月靈葩發不覺
尋常俗豔爭

別錄

原

占候有三卯三庚低田麥稻吉三庚二卯麥宜

高田無三卯不宜麥諺云三卯三庚麥出低坑三庚二
卯麥出均巧 月大盡有水災少菜 月令通考秋分

諺曰分社同一日低田盡叫屈秋分在社前斗米換斗

錢秋分在社後斗米換斗豆 朔日值白露果穀不實

值秋分主物價貴 十一日卜來年水旱侵晨或隔夜

于水邊無風浪處作一水罍子至晚看之若沒主水露

主旱平主小水又主本年好種麥名曰橫港

增 農政

全書八月朔日風雨宜麥麻子貴十倍又云凡朔要晴
惟此日要雨好種麥 諺曰白露前是雨白露後是鬼
其時之雨片雲來便雨稻花見日吐出陰雨則收正吐
之時暴雨忽來卒不能收遂致白颯之患若連朝雨反

不爲災

種植箭幹菜豌豆蠶豆萵苣麥水晶蔥蘿蔔

芥菜蔓菁蒜春菜菠菜油菜白菜蒿紅花烏菘胡荽胡

麻雞頭蔥木瓜罌粟黃矮菜芍藥菱 移植櫻桃橘李

柚枇杷柑杏梅銀杏桃梔子芍藥枸杞木犀梧桐橙牡

丹玫瑰丁香木筆石菊百合水仙山丹 壓插玫瑰薔

薇 貼接牡丹綠萼梅海棠 澆灌牡丹瑞香芍藥並

宜猪糞 收採割穀著實根 豇豆石楠實大棗狼毒

廣羣芳譜 天時譜 八月 三

牛膝韭花金毛狗脊人參酸棗山藥桔梗牡丹皮根蕒
苡草龍膽白歛當歸白蒺藜升麻芍藥根柴胡黃芩烏
藥根秦艽生地澤瀉巴戟天白蘚皮甘草白木黃連萱
草根香附子百合知母玄參天門冬山豆根地榆防己
前胡芋香苗胡黃連草薜桂皮茯神芋根蜀椒花椒甘
松茯苓丁香猪苓雷丸王不留行根苗花子藍種秦皮
虎杖巴豆角蒿 整頓修牡丹芍藥菊加土放芋根
鋤竹園蘭換盆刈芋忌澆橙橘 田忌天火酉地火卯
九焦午糞忌申荒蕪卯

九月 九日附見

增禮記月令季秋之月日在房昏虛中且柳中註日月

會于大火而斗建戌之辰也 菊有黃華 命百官貴

賤無不務內以會天地之藏無有宣出 乃命冢宰農

事備收舉五穀之要 是月也草木黃落乃伐薪爲炭

是月也天子以犬嘗稻先薦寢廟 **原**梁元帝纂要

九月曰季秋亦曰暮秋末秋暮商季商杪商又曰亥月

增花月令是月也菊有英巴竹筍芙蓉綻山藥乳橙

橘登老荷化爲衣 **瓶史**月表九月花盟主菊花花客

卿月桂花使令老來紅葉下紅

彙考**原**詩幽風九月叔苴 **夏小正**九月榮鞠樹麥傳

榮鞠鞠草也鞠榮而樹麥時之急也 **晉書樂志**九月

之辰謂之成戌者滅也謂時物皆衰滅也 九月之管

名曰無射射者出也言時陽氣上升萬物收藏無復出也

夢溪筆談

九月木可爲枝榦故曰太衡

九日

贈

西京雜記戚夫人侍兒賈佩蘭後出爲扶風人段儒妻說在宮內時九月九日佩茱萸食蓬餌飲菊花酒令人長壽菊花舒時并採莖葉雜黍米釀之至來年九月九日始熟就飲焉故謂之菊花酒

玉燭寶典

九日食蓬

餌飲菊花酒者其時黍秫并收因以黏米嘉味觸類嘗

新遂成積習

太清記

九月九日採菊花與茯苓松脂

久服之令人不老

原

風土記

九月九日律中無射而

數九俗尚此日折茱萸房以插頭言辟除惡氣爲禦初

寒

漢俗九日飲菊花酒以祓除不祥

續齊諧記

汝

南桓景隨費長房游學累年長房謂曰九月九日汝家中當有災宜急去令家人各作絳囊盛茱萸以繫臂登高飲菊花酒此禍可除景如言舉家登山夕還見雞犬牛羊一時暴死長房聞之曰此可代也今世人九日登高飲酒婦人帶茱萸囊蓋始于此

續晉陽秋陶潛九月九日無酒於宅邊菊叢中摘盈把坐其側望見白衣人乃王弘送酒即便就酌而後歸

增千金月令重陽之日必以肴酒登高眺遠爲時讌之遊賞以暢秋志酒必採茱萸甘菊以泛之既醉而還

原歲時雜記二社重陽以棗爲糕或加以棗以肉

洛陽風土記九日以

花糕法酒賜近臣

增賞心樂事重九登城把萸把菊

亭采菊蘇堤看芙蓉珍林嘗時果景全亭金橘芙蓉池
三色拒霜 東京夢華錄九月重陽都下貴菊有數種
其黃白色藥若蓮房曰萬齡菊粉紅色曰桃花菊白而
檀心曰木香菊黃色而圓者曰金鈴菊純白而大者曰
喜容菊無處無之酒家皆以菊花縛成洞戶都人出郊
外登高宴聚前一二日各以粉麵蒸糕遺送摻飢果實
如石榴子栗黃銀杏松子之類 熙朝樂事重九日登
高飲燕者必簪菊泛萸猶古人之遺俗也又以蘇子微
漬梅瀨雜和蔗霜梨橙玉榴小顆名曰春蘭秋菊

集藻書原

魏文帝與鍾繇九日送菊書歲往月來忽復

九月九日九爲陽數而日月並應俗嘉其名以爲宜於

長久故以宴享高會是月律中無射言羣木庶草無有射地而生惟芳蒨紛然獨榮非夫含乾坤之純和體芬芳之淑氣孰能如此故屈平悲冉冉之將老思餐秋菊之落英輔體延年莫斯之貴謹奉一束以助彭祖之術文賦散句原宋傅亮九月九日登凌巖館賦何物憐而節哀又雲悠而風厲悴綠繁于寒渚隕豐藿于荒澨翫中原之芬菊惜蘭圃之凋蕙旌竹柏之勁心謝梧楸之零脆梁昭明太子錦帶書重陽變序節景窮秋霜抱樹而擁柯風拂林而下葉金堤翠柳帶星采而均調紫塞蒼鴻追風光而結陣

五言古詩原晉陶潛九日閒居世短意常多斯人樂久

生日月依辰至舉俗愛其名露淒暄風急氣徹天象明
往燕無遺影來鴈有餘聲酒能祛百慮菊解制頽齡如
何蓬廬士空視時運傾塵爵耻虛罍寒華徒自榮歛襟
獨閤謠緬焉起深情棲遲固多娛淹留豈無成 乙酉
歲九月九日靡靡秋已夕淒淒風露交蔓草不復榮園
木空自凋清氣澄餘滓杳然天界高哀蟬無留響叢鴈
鳴雲霄萬化相尋繹人生豈不勞從古皆有沒念之中
心焦何以稱我情濁酒且自陶千載非所知聊以永今
朝 **增** 梁庾肩吾九日侍宴轍跡光周頌巡遊盛夏功
鈞陳萬騎轉闔闔九門通秋輝遂行漏朔氣繞桐風獻
壽重陽節廻鑿上苑中疏山開輦道間樹出離宮玉醴

吹巖菊銀牀落井桐御梨寒更紫仙桃秋轉紅飲羽山
西射浮雲冀北驄塵飛金埒滿葉破柳條空騰猿疑矯
箭驚鴈避虛弓彫材濫杞梓花綬接鸚鵡愧乏天庭藻
徒參文雅雄 陳江總於長安歸還揚州九月九日行
至薇山亭賦韻心逐南雲逝形隨北鴈來故鄉籬下菊
今日幾花開 唐太宗山閣晚秋山亭秋色滿巖牖涼
風度疎蘭尚染煙殘菊猶承露古石依新苔新巢封古
樹歷覽情無極咫尺輪光暮 **原** 宋梅堯臣九日永叔

長文原甫景仁鄰幾持國過飲秋堂雨更靜粲粲佳菊
芳置酒延羣公掇英浮新黃心猶慕淵明歸來醉柴桑
莫問車馬之去跡亂康莊 **蘇軾九日閒居和陶詩九**

日獨何日欣然愜平生四時靡不佳樂此古所名龍山
憶孟子粟里懷淵明鮮鮮霜菊豔溜溜糟牀聲閒居知
令節樂事滿餘齡登高望雲海醉覺三山傾長歌振履
商起舞帶索縈坎軻識天意淹留見人情但願飽秔稌
年年樂秋成

五言律詩

御製九日幸景山登高秋色淨樓臺登高紫禁隈千門鳴雁
度萬井霽煙開翠拂鑾輿上雲隨豹尾來佳辰欣宴賞滿
泛菊花杯

原唐中宗九月九日幸臨涓亭登高九日正乘秋三杯
興已周汎桂迎樽滿吹花向酒浮長房萸早熟彭澤菊

初收何藉龍沙上方得恣淹留 增王績九月九日野

人迷節候端坐隔塵埃忽見黃花吐方知素節回映巖

千段發臨浦萬株開香氣徒盈把無人送酒來 崔善

爲荅王無功九日秋來菊花氣深山客重尋露葉疑涵

玉風花似散金摘來還泛酒獨坐卽徐斟王弘貪自醉

無復覓楊林 原沈佺期九日侍宴應制御氣幸金方

憑高薦羽觴魏文頌菊藥漢武賜萸囊去鶴留笙吹歸

鴻識舞行年年重九慶日日奉天長 杜甫九日舊日

重陽日傳杯不放杯卽今蓬鬢改但媿菊花開北闕心

長戀西江首獨回茱萸賜朝士難得一枝來 九日曲

江綴席茱萸好浮舟菡萏衰季秋時欲半九日意兼悲

黃澤芳譜 天時譜五 九月

江水清源曲荆門此路疑晚來高興盡搖蕩菊花期

七言律詩

原

唐張諤九日

秋天林下不知春一種佳遊

事也均絳葉從朝飛著夜黃花開日未成句將橫陌樹
頻驚馬半醉歸途數問人城遠登高併九日茱萸凡作
幾年新 **杜甫九日藍田崔氏莊**老去悲秋強自寬興
來今日盡君歡羞將短髮還吹帽笑倩傍人爲整冠藍
水遠從千澗落玉山高並兩峰寒明年此會知誰健醉
把茱萸仔細看 **嚴維九日登高詩**家九日憐芳菊逐
客高齋瞰浙江漁浦浪花搖素壁西陵樹色入秋牕木
奴向熟懸金寶桑落新開瀉玉缸四子醉時爭講德笑
論黃霸屈爲邦 **增** **宋韓琦壬子重九菊有黃花氣候**

移重陽香萼已乾枝金鈴後坼孤芳在玉液輕浮一醉
宜煙渚去來鴻自適霜叢飛遶蝶何知風前客帽從吹
落且伴山翁倒接離邵雍秋暮西軒遶欄種菊一齊
芳戶牖軒牕總是香得意不能無興詠樂時况復遇豐
穰深秋景物隨宜好向老筋骸羸且康飲罷何妨更登
眺爛霞堆裏有斜陽楊萬里九日卽事呈尤延之昨
日茱萸未苦香今朝籬菊頓然黃浮英泛藻多多著舊
酒新醅細細嘗節裏且追千載事髣邊管得幾莖霜正
冠落帽多見態自笑狂夫老不狂金姚孝錫重九天
邊今日又重陽隴樹紅飛鴈信霜且插茱萸慰衰鬢莫
將詩句撓迴腸歌勤皓齒人俱醉舞戀晴暉蝶也忙來

日預期扶宿酒未應籬菊減秋香

五言排律

原

唐高宗九月九日端居臨玉辰初律啓金

商鳳闕澄秋色龍闕引夕涼野靜山氣斂林疎風露長
砌蘭窺半影巖桂發全香滿蓋荷凋翠圓花菊散黃揮
鞭爭電烈飛羽亂星光柳空穿石碎弦虛側月張怯猿
啼落岫驚鴈斷分行斜輪低夕景歸旆擁通莊 **沈佺**
期白蓮花亭侍宴應制九日陪天仗三秋幸禁林霜威
變綠樹雲氣落青岑水殿黃花合山亭絳葉深朱旗夾
小徑寶馬駐青澗花吏收寒果饗人膳野禽承歡不覺
暝遙響素秋砧 **增**王維奉和聖製重陽節宰臣及羣
官上壽應制四海方無事三秋大有年百生逢此日萬

壽願齊天芍藥和金鼎，茱萸插玳筵。玉堂開右个天樂，
動宮懸御柳，疎秋景，城霞拂曙煙。無窮菊花節，長奉柏
梁篇。

五言絕句 **增** 唐王勃九日九日重陽節開門有菊花不
知來送酒若箇是陶家 **原** 李白九日龍山飲九日龍

山飲黃花笑逐臣，醉看風落帽，舞愛月留人。九月十

日卽事昨日登高罷，今朝更舉觴。菊花何太苦，遭此兩

重陽。杜甫復愁每恨陶彭澤，無錢對菊花。如今九日

至，白覺酒須賒。 **增** 金字文虛中回文詩短葦低殘雨

虛舟帶晚潮，斷鴻歸暗浦。疎葉墮寒梢，感感蛩吟苦。

茫茫水驛孤，日銜山色暮。霜帶菊叢枯，明馬氏閒卿

暮秋野色滿園中閒情立晚風菊花含雨豔楓葉醉霜紅

七言絕句

原

唐張諤九日宴秋葉風吹黃颯颯晴雲日

照白鱗鱗歸來特問茱萸女今日登高醉幾人

增

王

維九月九日憶山東兄弟獨在異鄉爲異客每逢佳節

倍思親遙知兄弟登高處遍插茱萸少一人

宋韓琦

重九會光化二園誰言秋色不如春及到重陽景自新

隨分笙歌行樂處菊花萸子更宜人

王安石九日九

日無歡可得追飄然隨意歷山陂蔣陵西曲風煙慘也

有黃花一兩枝

陸游九月晦日作菊枝傾倒不成叢

桐葉凋零已半空自是老來多感慨不須蕭瑟爲秋風

炊煙漠漠衡門寂寒日昏昏倦易還數樹丹楓映蒼
檜天工解作范寬山 秋晚新築塲如鏡面平家家歡
喜賀秋成老來懶情慚丁壯美睡中聞打稻聲 秋晚
雜興汀樹猶青未著霜壠間稗穗已先黃放翁皓首歸
民籍爛醉狂歌坐簀牀 冷落秋風把酒杯半酣直欲
挽春回今年菰菜嘗新晚正與鱸魚一味來 金張本
九日月中對菊花上清光花下陰素娥惜此萬黃金一
杯寒露三更後誰信幽人更苦心

詩散句原齊王儉寥寥清景靄靄微霜草木搖落幽蘭
獨芳 梁沈約暮芝始綠年桂初丹上林葉下滄池水
寒 葉浮楚水草折梁園淒涼霜野惆悵晨鷗 丘遲

雲物游颺光景高麗枯葉未落寒花委砌 唐李白今

日雲景好水綠秋山明攜壺酌流霞舉菊汎寒榮 白居易

居易黍香酒初熟菊暖花未開聞聽竹枝曲淺酌茱萸

杯 陳江總園菊把黃華庭榴割朱實 原隋賀敬寒

花低岸菊涼葉下庭梧 增唐張錫菊彩揚堯日萸香

遶舜風 蕭至忠寵極萸房遍恩深菊酌餘 樊忱插

萸登鷲嶺把菊坐蜂臺 趙彥伯簪挂丹萸藥杯浮紫

菊花 原宋之問時菊芳仙醞秋蘭動睿篇 蘇瓌菊

氣先薰酒萸香更襲衣 孫佺應節萸房滿初寒菊圃

新 高適絳葉擁虛砌黃花隨濁醪 陰行先山棠紅

葉下岸菊紫花開 蔣山卿歲熟村多釀秋深菊始華

韋莊水館紅蘭合山城紫菊深白居易江南九月

未搖落柳青蒲綠稻穗香司空圖重陽未到已登臨

探得黃花且獨斟宋周必大遙知九日平山會笑

插茱萸滿鬢紅陸游但憶社醅按菊蘂敢希朝士賜

黃枝金周昂猶賴多情數枝菊肯留金蘂待重陽

元耶律楚材鴈門九月西風高綿梨萬樹垂金綃

曹伯啓蕃花不識秋光老猶向桑陰密處開唐嚴

維菊度重陽少殷璠重陽開滿菊花金杜荀鶴重

陽酒熟茱萸紫

詞原明陳繼儒昭君怨記得東坡老叟莫負清明重九

今日正重陽菊花黃花插滿頭歸去落日村楓樹

樹裏唱歌聲釣漁人

增

李俊民點絳脣秋樹風高

可憐憔悴門前柳白衣去後閒却持杯手一笑相逢

落帽年時友君知否南山如舊人比黃花瘦

宋蘇軾

浣溪沙珠檜絲杉冷欲霜山城歌舞助淒涼且餐山色

飲湖光共挽朱轡留半日強揉青蘂作重陽不知明

日爲誰黃黃機清平樂西風獵獵又是登高節一片

情懷無處說秋滿江頭紅葉誰憐鬢影淒涼新來更

點吳霜辜負萸囊菊盞年年客裏重陽

原

李易安醉

花陰薄霧濃雲愁永晝瑞腦噴香獸時節又重陽玉枕

紗厨半夜涼初透東籬把酒黃昏後有暗香盈袖莫

道不消魂簾捲西風人似黃花瘦

黃庭堅鷓鴣天黃

菊枝頭破曉寒人生莫放酒杯乾風前橫笛斜吹雨醉
裏簪花創著冠身健在且加殮舞裙歌板盡清歡黃
花白雪相牽挽付與時人冷眼看蘇軾南柯子霜降
水痕收淺碧粼粼露遠洲酒力漸消風力軟颼颼破帽
多情却戀頭詩酒若爲倚但把清樽斷送秋萬事到
頭都是夢休休明日黃花蝶也愁歐陽修漁陽傲九
日歡遊何處好黃花萬藥雕欄遠通體清香無俗調天
氣好煙滋露結功多少日脚清寒高下照寶釘密綴
圓斜小落葉西園風嫋嫋催秋老叢邊莫厭金樽倒
又九月霜秋秋已盡烘林敗葉紅相映惟有東籬黃菊
盛遺金粉人家簾幕重陽近曉日陰陰晴未定授衣

時節輕寒嫩新鴈一聲風又勁雲欲凝鴈來應有吾信

別錄原種植大小麥油菜豌豆水仙春菜芫荽萵苣白

菜冬瓜蒜芥菜罌粟 移植牡丹芍藥萱草山茶臘梅

麗春玫瑰竹諸果木 收採五倍子五穀種菊花薔薇

子芝蔴稗木瓜乾薑兔絲子大豆杜仲白朮粟厚朴芎

藭橄欖茱萸梔子皂莢皂角茶子豆稽茄種松節抓抓

兒 整頓採菊花鋤蓆草掘薑糞麥門冬川紫草收子

川芎筴掘芋收苧麻子去荷葉釭水 製用本草凡棗

用九月採日乾補中益氣久服神仙以其月採太乙餘

糧久服耐寒暑不饑輕身可醃諸色菜及造茭白藕蘿

荀葫蘆諸生鮮作香茄蒜茄蒜東瓜芥蠶
子地火寅糞忌巳九焦寅荒蕪未

〔田忌〕天火

佩文齋廣羣芳譜卷第五

佩文齋廣羣芳譜卷第六

天時譜

冬

增禮記鄉飲酒義北方者冬冬之爲言中也中者藏也
爾雅冬爲玄英註氣黑而清英冬爲安寧蔡邕
月令章句冬終也萬物於是終也梁元帝纂要冬曰
玄冬三冬九冬天曰上天風曰寒風勁風嚴風厲風哀
風陰風景曰冬景寒景時曰寒辰節曰嚴節草曰寒卉
黃草木曰寒木寒柯素木寒條

彙考原詩邶風我有旨蓄亦以禦冬 **增**禮記王制冬

薦稻 原漢書魯恭傳易曰潛龍勿用言十一月十二

月陽氣潛藏未得用事育噓萬物養其根莖而猶盛陰
在上地凍水冰陽氣否隔閉而成冬

晉書孝義傳劉

殷祖母王氏冬月思堇殷時年九歲乃於澤中慟哭聲
不絕者半日忽若有人云止止殷收淚視地有堇生焉
因得斛餘以供母

唐書五行志

長慶二年冬少雪

水不冰凍草木萌莢如正月

管子北方日月其時曰

冬其氣曰寒其德淳起溫怒周密斷刑致罰以符陰氣

大寒乃至五穀乃熟此謂月德

韓非子周公曰冬日

之閉凍也不固則春夏之長草木也不茂

原鵠冠子

斗柄指北而天下皆冬

呂氏春秋冬之德寒寒不信

其地不成剛地不成剛則凍閉不固

增

淮南子冬伐

薪蒸註大曰薪小曰蒸尚書大傳北方伏方也萬物

之方伏也冬中也物方藏於中也陽盛則吁荼萬物而
養之外陰盛則呼吸萬物而藏之內故曰呼吸者陰陽
之交接萬物之始終新論冬木可折原魏略顏斐

爲京兆尹課民當輸租時以車牛各致薪兩束爲冬月
寒冰炙筆硯之用增拾遺記漢明帝霜林園皆植寒

果積冰之節百果方盛俗謂之相陵霜林之聲訛也
神仙傳葛玄冬日能爲客設生瓜竹書帝舜四十七

年冬隕霜不殺草木原杜陽雜編李輔國遇嚴寒置
鳳首木於堂和煦如二三月又別名常春木運行論

注凝慘冰雪寒之化凜冽霜電寒之用柔爽之物遇寒

則堅寒之致太虛澄淨黑氣浮空天色黯然高空之寒
氣也氣如散麻本末皆黑川澤之寒氣也太虛清白空
明雪映遐邇一色山谷之寒氣也太虛白昏大明不翳
如霧雨氣遐邇肅然北望色玄凝霧夜落此水氣所生
寒之化也太虛微黑白埃昏翳天地一色遠視不分此
寒溫凝結雪之將至也地裂水冰河流乾涸枯澤浮鹹
木斂土堅是土勝水水不得自清水所生寒之用也

增歲華紀麗羽律纔移乾風更肅霜樹盡摧於枯葉玉
壺漸結於輕冰松秀寒姿桂榮貞質星斗旋臨亥位金
烏迭次房星北戶堊扉之日東臯穫稻之辰 **原**清閒
供冬時午後攜籠向古松懸崖間敲冰煮建茗日晡布

衣皮帽策蹇驢問寒梅消息薄暮圍爐促膝煨芋魁說
無上偈

集藻 文賦散句 **增** 楚屈原遠遊嘉南州之炎德兮麗桂
樹之冬榮 **晉** 陸機感時賦寒冽冽而感興風謾謾而
妄作鳴枯條之泠泠飛落葉之漠漠 **唐** 趙自厲寒賦
幽林風掃時物霜殘柔條危勁與室淒寒有美人兮心
恍惚情怵悼而靡安 **伊** 鮮物之皆瘁獨霜松之常青
縱寒苦之飄激淬堅明而自寧

五言古詩 **增** **晉** 曹毗詠冬綿邈冬夕永凜厲寒氣升離
葉向晨落長風振條與夜靜輕響起天清月輝澄寒水
盈渠結素霜竟欄凝今載忽已暮來紀奄復仍 **原** **梁**

簡文帝立圃冬夕洞門扉未掩金壺漏已催
曛煙生澗曲暗色起林隈雪花無有帶冰鏡
不安臺階楊始倒插浦桂半新栽陳根委
落蕙細葉發香梅雁去銜蘆止猿戲繞枝來

七言古詩

增

宋陸游冬夜吟昨夜疑霜皎如月碧瓦鱗

鱗凍將裂今夜明月却如霜竹影橫窻更清絕造物有意娛詩人供與詩材次第新
饑鴻病鶴自無寐山窮水絕誰爲鄰西村梅花消息動唧唧寒醅漸鳴瓮儘將醉帽插幽香
此生莫作長安夢元何中山中樂千花重作陽春節野杏山桃隨處發莫思前度看花誰已見荒
原芳草歇穆山山下數灣月華山山崖千丈雪幽人獨

在雪月中要與梅花成四絕山中之樂誰得知我獨知
之來何爲除却山家新臘醞世間無事可相宜 **原鄭**
奎妻冬月詞山茶未開梅先吐風動簾旌雪花舞金盤
冒冷塑後現綉幙圍春護鸚鵡倩人呵筆畫雙睂脂水
凝寒上臉遲妝罷扶頭重照鏡鳳釵斜壓瑞香枝

五言律詩

增

唐太宗冬日臨昆明池

石鯨分玉溜劫燼

隱平沙柳影冰無葉梅心凍有花寒野凝朝霧霜天散
夕霞歡情猶未極落景遽西斜 **張蟻次韻和友人冬**
日書齋四季多花木窮冬亦不凋薄冰行處斷殘火睡
來消象版簽書帙蠻藤絡酒瓢公卿有知己時得一相
招 **宋張耒冬日雜興**水落橋痕在沙乾岸草枯霜餘

槐老壯風際竹清疎
啄木高逾響
鶴鷓飛且呼
二年親友絕
惟有對禽魚
空山身欲老
徂歲臘還來
愁怯年年柳
傷心處處梅
綠蔬挑甲短
紅蠟點花開
冰雪如何有
東風日夜回
唐庚立冬後作
暗蔗入佳境
冬來幽興長
瘴鄉得好語
昨夜有飛霜
籬下重陽在
醅中小至香
西鄰蕉向熟
時致一梳黃
陸游冬日吳中寒氣薄
歲暮亦和風
移樹來村北
尋僧渡港東
露葵收半綠
霜稻杵微紅
一飽無餘念
吾生正不窮
朱子冬日蕭條
時序晚已復
度高秋回澗
白波起通川
絳樹稠晨風
散清露嘉稻
卷平疇
獨懷志士感
歲事幸將休
清霜染澗樹
蕭索向嚴冬
密雨有時集
寒雲無定容
波明橫瀨

出風急遠林空一極窻間眺高旻蠹亂峰

七言律詩

增

唐韓偓冬日蕭條古木銜斜日戚瀝晴寒

滯早梅愁處雪煙連野起靜時風竹過牆來故人每憶
心先見新酒偷嘗手自開景狀入詩兼入畫言情不盡
恨無才

宋真山民初冬林葉新經數夜霜地爐獨擁

一山房塵書邀我共高閣濁酒勸人歸醉鄉費省家貧
還似富身閒日短亦如長梅花苦欲催詩興又破梢頭
半點香

原

明文徵明煙鎖凝塵四壁空青燈欲燼夜

溶溶涼聲度竹風如雨碎影搖窻月在松病枕蕭條聞
永漏草堂搖落已深冬不堪酒醒淒然地撫景懷人意
萬重

王象晉蜡祭喧喧土鼓搓紛紛髦穉擁如波詠

幽恍際周王世布令行宣青帝和冰筴迎陽辭碧瓦梅
珠散彩耀繁柯春光積漸來茅舍對酒能忘鼓腹歌

孟淑卿默坐深閨思有餘霜威漸覺襲衣裙青綾被冷
無鴛夢紫塞天寒斷雁書竹葉舞風侵戶響梅花和月
上窻虛雙蛾爭似庭前柳臘盡春來忽又舒

五言絕句

增

唐王勃冬郊行望桂密巖花白梨疎林葉

紅江臯寒望盡歸念斷征篷

金宇文虛中回文鵲健

呼風急鳥啼促景殘窟深宜兔蟄蒲折蔭魚寒

七言絕句

增

唐元稹西歸寒花帶雪滿山腰著柳冰珠

滿碧條天色漸明回一望玉塵隨馬度藍橋

元王暉

蘭溪道中豫樟蔽日無黃落竹筍經霜更碧鮮記取江

南光景異暖煙晴日是冬天
郭珏冬詞疎林晴旭散
啼鴉高閣朱簾窳地遮爲問王孫歸也未玉梅開到北
枝花

詩散句

增

唐劉孝孫凍柳含風落寒梅照日鮮

郎士

元高松殘子落寒井凍痕生

李頻芸細書中氣松疎

雪後陰

宋陸游藤疎不覆架桐落欲平溝

唐張籍

海花蠻草連冬有行處無家不滿園

十月

立冬小雪附見

增禮記月令孟冬之月日在尾昏危中且七星中註日
月會於析木之津而斗建亥之辰也

原

梁元帝纂要

冬曰孟冬亦曰上冬日陽月

花月令是月也蘆傳冬

菜蒔木葉避霜芳草斂漢宮秋老苧蔴護其根

增瓶

史月表十月花盟主白寶珠茶梅花客卿山茶花甘菊
花花使令野菊寒菊芭蕉

彙考

增

詩豳風十月穫稻爲此春酒以介眉壽

十月

納禾稼黍稷重穆禾麻菽麥

晉書樂志

十月之辰謂

爲亥亥者刻也言時陰氣刻殺萬物也

十月之管名

爲應鐘應者和也謂歲功皆成應和陽功收而聚之也

唐書西域傳東女國巫者以十月詣山中布糟麥呪

呼羣鳥俄有鳥來如雞狀剖視之有穀者豐歲名曰鳥

卜

淮南子孟冬之月招搖指亥爨松燧火

荆楚歲

時記十月朔日黍曜俗謂之秦歲首**注**未詳黍曜之義

今北人此日設麻羹豆飯常爲其始熟嘗新耳禰衡別傳云十月朝黃祖在艤臚上會設黍臠是也原化記

崔希真十月一日雪遇老父於門獻松花酒老父曰此酒無味乃於懷中取丸藥置酒中味極美後問天師師曰此真人葛洪第三子其藥乃千歲松膠也夢溪筆

談十月萬物登成可以會計故曰功曹賞心樂事十月滿霜亭蜜橘賞小春花杏花莊挑薺東坡詩注嶺

南氣候不常菊花開時卽重陽涼天佳月卽中秋十月九日菊始開乃與客作重陽立冬原禮記月令是月

也以立冬先立冬三日太史謁之天子曰某日立冬盛德在水天子乃齋立冬之日天子親率三公九卿大夫

以迎冬於北郊

〔三禮義宗〕

十月立冬爲節者冬終也

立冬之時萬物終成故爲節名

〔東京夢華錄〕

立冬前

五日西御園進冬菜京師地寒冬月無蔬菜上至宮禁

下及民間一時收藏以充一冬食用

〔熙朝樂事〕

立冬

日以各色香草及菊花金銀花煎湯沐浴謂之掃疥

小雪

〔增〕

〔三禮義宗〕

十月小雪爲中者氣序轉寒雨變成

雪故以小雪爲中

集藻

〔謠〕

〔增〕

晉夏侯湛苦寒謠惟立冬之初夜天慘慄以

降寒霜皚皚以被庭冰澹灑于井榦草槭槭以疏葉木

蕭蕭以零殘松隕葉於翠條竹摧柯於綠竿

五言古詩

〔原〕

梁簡文帝大同十年十月戊寅詩喧塵是

時息靜坐對重巒冬深柳條落雪後桂枝殘星明露色
盡天白雁行單雲飛乍想閣冰結遠疑紈晚橘隱重屏
枯藤帶迴竿荻陰連水氣山峰染月寒 **增**唐白居易
湓浦早冬潯陽孟冬月草木未全衰祇抵長安陌涼風
八月時日西湓水曲獨行吟舊詩蓼花始零落蒲葉稍
離披但作城中想何異曲江池

七言古詩 **增**宋陸游初冬步至東村八月風吹粳稻香
九月蕎熟天始霜男耕女饁常滿野宿麥覆塊皆蒼蒼
豐年比屋喜迎客花底何曾酒杯進家人但覓浩歌聲
不在東阡在南陌

五言律詩 **原**唐杜甫孟冬殊俗還多事方冬變所爲破

柑霜落爪嘗稻雪翻匙巫峽寒都薄鳥蠻瘴遠隨終然
減灘瀨暫喜息蛟螭 **增**元僧方潤初冬作沈寥蕭瑟
後霽色却怡人霜已干林曙天猶十月春黃花蝶過晚
白葦雁銜新野性自夷曠非關絕世塵

七言律詩 **原**唐陸龜蒙小雪後書事時候頻過小雪天
江南寒色未全偏楓汀尚憶逢人別麥隴惟應欠雉眠
更擬結茅臨水次偶因行藥到村前鄰翁意緒相安慰
多說明年是稔年 **增**宋鄭俠次孟堅初冬晴和見梨

桃二花作十月南天尚暑襟幽花何怪動清吟半扉素
藥呈修徑幾朶天紅出茂林地借小春回暖氣日勻疎
影轉輕陰惟應幕府多才俊不負行臺醉客心 **陸游**

初冬鉏犁滿野及冬耕時聽兒童叱犢聲逐客固宜安
散地閒民何幸樂昇平雪花漫漫蕎初熟綠葉離離薺
可烹飯飽身閒書有課西窻來趁夕陽明 志士逢秋
已自傷老人况復惜年光正看溪碓舂粳滑又見山坡
下麥忙桐落井牀多槁葉菊殘衫袖尚餘香讀書有課
真當勉劬貯明膏伴夜長

七言絕句

御製塞外初冬陰山南去雁行多渺渺沙原六御過報是初
冬新律改依然霜曉氣暄和

增唐樊晃十月南中感懷南路蹉跎客未回常嗟物候
暗相催四時不變江頭草十月先開嶺上梅 張登小

雪日戲題甲子徒推小雪天刺桐猶綠槿花然陽和長
養無時歇却是炎洲雨露偏原宋蘇軾初冬荷盡已
無擎雨蓋菊殘猶有傲霜枝一年好景君須記正是橙
黃橘綠時增鄭思肖小春花天地無情正北風飛鴻
哀咽亂雲中此時縱使開千樹不及東皇一點紅元
僧善住十月清霜欲重小春天楊柳蕭疎帶曉煙無奈
東皇苦多事又傳春信到梅邊

詩散句增唐杜甫漢源十月交天氣涼如秋草木未黃
落况聞山水幽栗亭名更佳下有良田疇充腸多薯蕷
崖蜜亦易求密竹復冬筍清池可方舟雖傷旅寓遠庶
遂平生游

詞原 宋歐陽修漁家傲 十月小春梅蕊綻紅爐暖閣新
妝遍錦帳美人貪睡暖羞起嬾玉壺一夜冰漸滿 樓
上四垂簾不捲天寒山色偏宜遠風急雁行吹字斷紅
日晚江天雪意雲撩亂

別錄原

占候家熟事親十月有三卯糴平無則穀貴

立冬日先立一丈竿占影得一尺大疫大旱大暑大饑
二尺赤地千里三尺大旱四尺五尺低田收六尺高低
田熟七尺高田收八尺澇九尺大水一丈水入城郭
朔日值立冬主災異值小雪有東風春米賤西風春米
貴其日用斗量米若綴在斗來春陡貴甚驗 **種藝** 豌豆

豆油菜葵菜冬芥菜麥菠菜烏菘萱草冬白菜黃芪防

風

移植五味子黃精梅柑五加皮菊橙橘

收採梅

杞枳殼山茱萸芎藭五加皮根梔子阜莢麥門冬苦參
白荳蔻貝母牛膝女貞葉桑葉決明子陳皮地黃山藥
子槐實芙蓉花苧根冬瓜栝蒳根蕨根甘蔗山芋 澆
培橙橘諸果 包裹諸畏寒花果 整諸畏寒花木根
上土壅芋蔴 壅茴香根 整頓窖茉莉芙蓉蘭菊菖
蒲夾竹桃虎刺養蘿菖種蒼蓬菜耘麥 田忌天火卯
地火丑糞忌亥九焦亥荒蕪寅

十一月

冬至附見

增

禮記月令

仲冬之月日在斗昏東辟中且軫中注日

月會於星紀而斗建子之辰也 是月也日短至陰陽

爭諸生蕩 芸始生荔挺出 **原**梁元帝纂要是月日

玄明天又曰廣寒月 **花月令**是月也芸生楓丹蕉紅

巖桂馥枇杷綴金松柏後凋 **增**瓶史月表花盟主紅

梅花客卿楊妃茶花花使令金盞花

彙考增周禮地官仲冬斬陽木 **注**鄭司農云陽木春夏

生者玄謂陽木生山南者 **原**前漢書律歷志十一月

乾之初九日陽氣伏於地下始著爲一萬物萌動鍾於

太陰 **增**淮南子見一葉之落知歲之暮觀瓶中之水

知天下之寒 **原**列仙傳仙人馬湘在刺史馬植坐上

仲冬月以酒杯盛土種瓜子須臾蔓引生實食其味甚

美 **玉燭寶典**月晦煮赤豆作糜以祭門禳疫也 **增**

荆楚歲時記仲冬之月采擷霜燕菁葵等雜菜乾之並

爲鹹菹 **賞心樂事**十一月摘星軒枇杷花味空亭臘

梅蒼寒堂南天竺花院水仙 **成都古今記**十一月有

梅市 **一統志**雷陽界稻十一月下種揚雪耕耘次年

四月熟與他地迥異 **冬至****原**周禮秋官柞氏掌攻草

木及林麓冬日至令剝陰木而水之 **增**周禮秋官薙

氏掌殺草冬日至而耜之 **漢書律歷志**候氣之法爲

室三重戶閉塗蠹周密布緹幔室中以木爲瑱每律各

如之內卑外高從其方位加律其上以葭莩灰抑其兩

端案曆而候之氣至者灰去 **魏相傳**冬至則八風之

序立萬物之性成 **呂氏春秋**冬至後五旬十日菖蒲

生菖者百卉之先生者也。淮南子冬至日則陽乘陰

是以萬物仰而生。原易通卦驗十一月廣漠風至則

蘭射于生。增孝經緯斗指子爲冬至至有三義一者

陰極之至二者陽氣始生三者日行南至故謂之至

玉燭寶典十一月建子周之正月冬至日極南影長陰

陽日月萬物之始當黃鍾律其管最長故有履長之賀

原西域志天竺國以十月二十六日爲冬至冬至則

麥秀。帝京景物略冬至日畫素梅一枝爲瓣八十有

一。日染一瓣瓣盡而九九畢則春深矣。日九九消寒圖

集藻五言古詩原晉傅亮冬至星昴殷仲冬短晷窮南

陸柔荔迎時萋芳芸應節馥。北齊蕭愨冬至應教天

宮初動磬緹室已飛灰暮風吹竹起陽雲覆戶來折冰
開荔色除雪出蘭栽慚無宋玉辯濫吹楚王臺

五言律詩

原

唐杜甫草堂卽事荒村建子月獨樹老夫

家雪裏江船渡風前竹徑斜寒魚依密藻宿鷺起圓沙
濁酒禁愁得無錢何處賒

宋邵雍冬至冬至子之半

天心無改移一陽初動處萬物未生時
立酒味方淡太音聲正希此言如不信更請問庖羲

增

范成大長至

日與同舍遊北山歲晚山同色湖平霧不收寒雲低閣
雪佳節靜供愁竹柏森嚴立蒲荷索莫休瘦筇知脚力
政爾耐清遊

七言律詩

原

唐杜甫小至

天時人事日相催冬至陽生

春又來刺繡五紋添弱線吹葭六管動飛灰岸容待臘
將舒柳山意衝寒欲放梅雲物不殊鄉國異教兒且覆
掌中杯韓偓冬至夜作中宵忽見動葭灰料得南枝
有早梅四海便應枯草綠九重先覺凍雲開陰氛莫向
河源塞陽氣今從地底回不道慘舒無定分却憂蚊響
又成雷明李夢陽冬至感懷奉天門下玉欄橋此日
催班侍早朝占史奏雲權萬國大官傳宴散層霄苑梅
應律春先動宮柳迎風色欲搖一出忽驚今十載百年
勲業有漁樵

七言絕句

御製途中長至關塞經時躡未回律逢葭琯暗飛灰遙知日

晷添宮線暖閣前頭放早梅

原宋蘇軾冬至日獨游吉祥寺井底微陽回未回蕭蕭
寒雨濕枯菱何人更似蘇夫子不是花時肯獨來
冬
至後十餘日復至吉祥寺東君意淺著寒梅千朵深紅
未暇裁安得道人殷七七不論時節遣花開
明董其
昌長安冬至子月風光雪後看新陽一縷動長安禁鐘
乍應雲門曲寶樹先驅黍谷寒

詩散句**原**宋楊萬里禽翻竹葉霜初下人立梅花月正
高
僧洪惠夜久雪猿啼嶽嶺夢回清月上梅花

詞**原**宋曾實軒小重山薄雪初銷銀月端疎疎浮竹影
紅闌梅花夢事落孤山禁人處霜重鼓聲寒
留取曉

來看斑簾低小閣燭花殘一帆明月去蒼灣空相憶雪
浪月痕翻 增李肩吾風入松霜風連夜做冬晴曉日
千門香葭暖透黃鐘管正玉臺彩筆書雲竹外南枝意
早數花開對清樽 香闈女伴笑輕盈倦繡停針花磚
一線添紅景看從今迤邐新春寒食相逢何處百單五
箇黃昏

別錄原

占候四時纂要冬至日數至元旦五十日者民

食足若不滿五十日者一日減一升有餘日益一升最

驗 至前米價長至後必賤落則反貴 寒不降五月

雷電 朔日值冬至主年荒歲凶 古占書以朔日冬

至爲令辰 田家五行志得壬一日主旱二日小旱三

日赤旱四日五穀大熟五日小水六日大水七日河決
八日海翻九日大熟十日少收十一十二日五穀不成

〔曆法〕冬至日中豎八尺表其晷如度者其歲美人和
不則歲惡人惑晷進則水晷退則旱進一尺則日食退
一尺則月食 曆家推朔旦冬至夜半甲子謂之曆元
最難得 〔禁忌〕千金方勿食經霜菜令人面無光澤

〔增〕居家宜忌十一月勿食生菜發宿疾勿食生韭多涕

唾 〔原〕種藝松檜春菜箭榦菜茼蒿杉柏菠菜黃矮菜

萵苣 〔移植〕松臘梅檜 〔壅培〕石榴牡丹椒瑞香麥冬

芙蓉木香竹芍藥 〔收採〕冬葵子陳皮欵冬花鬼箭

整頓澆海棠芟薔薇修茶蘼芟木香鋤油菜 〔田忌〕天

火午地火子糞忌丑九焦申荒蕪午

十二月

小寒大寒臘日除夕附見

禮記月令季冬之月日在婺女昏婁中旦氏中**注**日

月會於玄枵而斗建丑之辰也 水以入令告民出五

種注水既入而令田官出五種以明大寒氣過農事將

起也 是月也日窮於次月窮於紀星回於天數將幾

終歲且更始專而農民毋有所使 **原**梁元帝纂要季

冬亦曰暮冬杪冬除月暮節暮歲窮稔窮紀 **花月令**

是月也梅蘂吐山茶麗水仙凌波茗有花瑞香郁烈山

礬鬯發 **增**瓶史月表十二月花盟主蠟梅獨頭蘭花

花客卿茗花漳茶花花使令枇杷花

彙考

增

禮記

王制

豕宰制國用必於歲之抄五穀皆入

然後制國用

夏小正

十有二月納卯蒜

傳卯蒜也者

本如卯者也

韓非子魯哀公問於仲尼曰冬十二月

賈霜不殺菽何爲記此對曰此言可以殺而不殺也宜

殺而不殺梅李冬實天失道草木猶犯干之而况人君

乎

荊州記

淮陽郡十二月一日種穀至明年三月新

穀便登

賞心樂事

十二月綺互亭檀香蠟梅湖山探

梅花院蘭花玉照堂看早梅

榕城隨筆

漳於八閩爲

極南得氣最暖其人生不識霜雪之狀隆冬不禦裘絮

桃李以臘月華大寒之候桂香襲人特爲可愛

小寒

原

孝經

緯冬至後十五日斗指癸爲小寒陽極陰生乃

爲寒今日初寒尚小也 詩含神露小寒爲飭者亦形

於大寒故謂之小言時寒氣猶未極也 大寒增孝經

緯小寒後十五日斗指丑爲大寒至此栗烈極也 詩

含神露大寒者上形於小寒故謂之大十一月一陽爻

初起至此始徹陰氣出地方盡寒氣併在上寒氣之逆

極故謂大寒 臘原禮記郊特牲天子大蜡八伊耆氏

始爲蜡蜡也者索也歲十二月合聚萬物而索饗之也

增郊特牲蜡之祭也主先嗇而祭司嗇也祭百種以

報嗇也 原風俗通夏曰嘉平殷曰清祀周曰大蜡漢

改曰臘臘者獵也因獵取獸以祭先祖或曰新故交接

大祭以報功也 增荆楚歲時記十二月八日爲臘日

續通志卷六十二月

諺語臘鼓鳴春草生村人並擊細腰鼓戴胡頭及作金剛力士以逐疫

原卓異記

天授二年臘卿相詐稱上

苑花開請幸則天許之乃遣使宣詔曰明朝遊上苑火急報春知花須連夜發莫待曉風吹於是明晨名花瑞草皆發羣臣咸服其異

養生要論

十二月臘夜令人

持椒卧井旁無與人言納椒井中可除瘟病

杜氏通

典蜡之義自伊耆氏之代而有其禮古之君子便之是報田之祭也其神農初爲田事故以報也

風土記東

京作浴佛會以諸果品煮粥謂之臘八粥

農政全書

冬至後第三戌爲臘臘前兩三番雪謂之臘前三白大宜菜麥諺云若要麥見三白

除夕

增

吳中風俗記吳

中風俗除夜村落間以禿帚若蔴蘆竹枝等燃火炬縛於長竿之梢以照田蠶爛然徧野以祈絲穀 除夜宜焚辟瘟丹或蒼朮阜角楓芸諸香以辟邪祛濕宣鬱氣助陽德卽闕室虛堂亦無不到

集藻

文賦散句

增

晉傅玄大寒賦

百川咽而不流兮冰

凍合于四海扶木顛頽于暘谷若華零落于濛汜

陸

雲歲暮賦時凜冽其可悲兮氣蕭條以傷心悽風愴其鳴條兮落葉翻而灑林 唐王勃守歲序槐火滅而寒

氣消蘆灰用而春風起魚鱗布葉爛五色而翻光鳳腦吐花燦百枝而引照 柏葉爲銘影泛新年之酒椒花入頌先開獻歲之詞 張九齡歲除登逍遙臺序南土

融和覺寒氣之向盡東郊物暖愛春色之方來

四言古詩原晉裴秀大蜡詩日躔星紀大呂司辰玄象

改次庶衆更新歲事告成八蜡報勤告成伊何年豐物
阜豐禋孝祀介茲萬祐報勤伊何農功是歸穆穆我后
務茲蒸黎宣力菑畝沾體暴肌飲饗清祀四方來綏充
牝郊甸鱗集京師交錯貿遷紛葩相追反袂成幕連袵
成帷有肉如丘有酒如泉有穀如林有貨如山和氣來
臻率土同歡祥風協順降祉自天方隅清謐嘉祚日延
與民優游享壽萬年

五言古詩原梁庾肩吾歲盡應令歲序已云殫春心不
自安聊開柏葉酒試奠五辛盤金薄圖神燕朱泥印鬼

九梅花應可折倩爲雪中看

五言律詩

原

唐太宗除夜暮景斜芳殿年華麗綺宮寒

辭去冬雪暖帶入春風階馥舒梅素盤花捲燭紅共歡
觴故歲迎送一宵中 歲陰窮暮紀獻節啓新芳冬盡

今宵促年開明日長冰消出鏡水梅散入風香對此歡
終宴傾壺待曙光 沈佺期歲夜安樂公主滿月侍宴

應制除夜子星迴天孫滿月杯詠歌麟趾合簫管鳳凰
來歲炬常燃桂春盤預折梅聖皇千萬壽垂曉御樓開

史育除夜今歲今宵盡明年明日來寒隨一夜去春
逐五更回氣色空中改容顏暗裏催風光人不覺已著

後園梅

杜甫杜位宅守歲守歲阿戎家椒盤已頌花

盍簪喧櫪馬列炬散林鴉四十明朝過飛騰暮景斜誰
能更拘束爛醉是生涯 韋莊歲除對王秀才作我惜
今夜促君愁玉漏頻豈知新歲酒猶作異鄉身雪向寅
前凍花從子後春到明追此會俱是隔年人 增宋陸
游臘月今冬少霜雪臘月厭重裘漸動園林興頓寬薪
炭憂山陂泉脈活村市柳枝柔春餅吾何患嘉蔬日可
求

七言律詩

御製賦得爆竹聲中一歲除是日微雪爆竹連宵不夜城占
年積素卽豐盈維新四始全仁政修省三朝冀太平拂曙
和風臨上日通晨淑氣擁華清願將柏葉芳尊酒賜與臣

鄰共大羹

增唐杜審言守歲待宴季冬除夜接新年帝子王孫捧
御筵宮闕星河低拂樹殿前燈燭上薰天彈弦奏節梅
風入對局探鉤柏酒傳欲向正元歌萬壽暫留歡賞寄
春前 **原**杜甫臘日臘日常年暖尚遙今年臘日凍全
消侵陵雪色還萱草漏洩春光有柳條縱酒欲謀良夜
醉還家初散紫宸朝口脂而藥隨恩澤翠管銀罌下九
霄 十二月初一日作今朝臘月春意動雲安縣前江
可憐一聲何處送書雁百丈誰家上瀨船未將梅蘂驚
愁眼更取椒花媚遠天明光起草人所羨病廢幾時朝
日邊 **增**宋宋郊十二月望日禁中作閏曆先春破臘

寒綵花金勝寵千官冰從太液池邊動柳向靈和殿裏
看瑞氣因風飄禁仗暖暉依日上仙盤須知聖運隨生
殖萬國年年共此懽陸游歲未盡前數日偶題長句
老向人間迹轉孤參差煙火出菰蒲數畦綠菜寒猶茁
一勺清泉手自斟穀賤窺籬無狗盜夜長暖足有狸奴
歲闌更喜人強健小草書成鬱壘符風號四野雲如
墨徂歲消磨不滿旬瑞雪便應平地尺野梅又報一年
春長河斷渡冰將合古寺題詩手爲皴僵卧閉門行路
絕安知今代獨無人原明文徵明雲霞駘蕩曉光和
手折梅花對酒歌暮齒不嫌來日短霜髭較似去年多
東風漸屬青陽候流水微生綠玉波烏弄新音晴晝永

相看不飲奈春何

五言絕句

原

唐太宗太原名侍臣守歲四時運灰瑄一

夕變冬春送寒餘雪盡迎歲早梅新

七言絕句

原

宋韓絳新陽氣候未全佳尚縱寒威壓歲

華賴有椒湯共卯酒不妨和雪看梅花

增

范成大除

夕前二日夜雨雪不成花夜雨來隴頭一洗定無埃小

童却怕溪橋滑明日先生合探梅

楊萬里臘裏立春

嫩日催青出凍菱小風吹白落疎梅殘冬未放春交割

早有黃蜂紫蝶來

詩散句

增

唐殷璠雪冷江空歲暮時竹陰梅影月參差

宋韓琦一箭尚留終在臘萬花潛發欲驚春

楊萬

里臘月潮州見桃李元來不作好春看

明王韋好記

流年收柏葉乍消殘雪見梅枝

詞增宋汪莘行香子野店殘冬綠酒春濃念如今此意

誰同溪光不盡山翠無窮有幾枝梅幾竿竹幾株松

籃輿乘興薄暮疎鐘望孤村斜日匆匆夜窻雪障曉枕

雲峰便擁漁蓑頂漁笠作漁翁

別錄原負暄雜錄二十四日五更取井花水平旦第一

汲者盛淨器中量人口多少浸乳香至歲旦五更暖令

溫從小至大每人以乳香一小塊飲水三吸一年不患

時疾 **法**天生意大寒冷早出嚙真麻油則耐寒 勿

食經霜菜果減人顏色 **占候**柳眼青來年夏秋米賤

月內萌類不見六月五穀不實 二十四日田夫牧

豎候昏時爭立竿燎火於野名日照田蠶看火色占來
年水旱白主水紅主旱猛烈主豐衰微主歉東北風吉
臘盡火光及燒糶盆爆竹看火色大率與田蠶火同

種藝 麻苧蒿菠萊栽桑 〔移植〕山茶玉梅海棠柳

壓插 石榴薔薇月季木香十姊妹 〔收採〕大戟根節欵

冬花木蘭皮鬼箭穀樹皮冬葵子蒲公英菖蒲忍冬藤

〔壅培〕橘桑苧麻韭竹芍藥 〔整頓〕墾秧田燒荒修杞

柳修桑浴蠶種伐竹木磨桑葉造農具挑溝塘乾蒿砍

穀樹刈茅草葺園籬酵河泥貯雪水貯麻油 〔田忌〕天

火酉地火子糞忌卯九焦已荒蕪戌

佩文齋廣羣芳譜卷第六